

2 CORINTIOS

Pablo queédih ã túyat túutat

¹ Weém, Pablo, biíhdih daacát túutnit, yeéb Corinto tútchidih moón Jesúíhwādhíh wā wahna caá.* Dios ã náahat pah, Jesucristoíh doonádhíh ã naáwát túutni wā jumna caá. Nin núodih wahna, jwí úud panihni Timoteojíh yeebdíh búdí jwí túyat túutna caá. Bitá Acaya baácdíh moón Jesúíhwābút nin wā daác wahnidih í joyó naáh. ² Jwí íp, jwí Maáh Jesucristobút yeebdíh búdí oinit, í teo wáaca naáh, bíícdih ñi túi jummat pínah niijná.

Ded pah yeejép yapat

³ Jwiítdih en jíghnit, Dios ãpí teo wáacna caá. Páant ã teo wáacachah, caán, jwí Maáh Jesucristo ã ípdih búdí wēinit, “Jwiítdih búdí oinit, ma teo wáacat túina caá, Paá”, niiját caá jwiítdih náahap. ⁴ Yeejép jwí yapachah, jwiítdih caanjéh ãpí túi teo wáacna caá, bita yeejép í yapachah, queétdihbút jwí teo wáacat pínah niijná. ⁵ Nin baácbóó Jesucristo jum láa, túbit yeejép át yapap wut jí. Áih túini doonádhíh bohéna, caán Jesús ã yapatji pah muntih jwiítbút dawá láa túbit yeejép jwí yapna caá. Jesucristoíh jumna, páant yeejép jwí yapachah, Dios jwiítdih búdí ãpí teo wáacna caá. ⁶ Pánih yeejép yapna, yeebdíh jwí jéih teo wáacna caá, Diosdih chah ñi túi jenah joyát pínah niijná. Yeejép yapna, Dios jwiítdih ã teo wáacachah, jwiítbút yeebdíh jwí jéih teo wáacna caá, ñi jíghat ã yayát pínah niijná. Jwí yeejép yapat pahjeh muntih, yeebbút yeejép ñi yapachah, “Dios ã túi teo wáacbípná caá”, niíj jenah joinít, caandíh ñi cádahcan níft. ⁷ Pánihna, “Weém yeejép wā

* 1:1 Hch 18.1

yapat pahjeh muntih, queébtut yeejép ĩ yapna caá. Dios weemdíh búdí ã teo wáacat pah, queédihbut búdí ã teo wáacachah, caandíh ĩ túi jenah joí cádahcan níft”, wã níj jéihna caá.

⁸ Bũũ wã úũdwã panihnitá, nindih ñi túi náhninaá: Weém Asia baácboó jum láa, tũbit yeejép wã yapap jĩ. “Wã jéih bũũjácana níft. Wã wũnbipna caá.* ⁹ Weemdíh ĩ mao yohbipna caá”, wã níj jenah joyóp yũh jĩ. Obohjeéhtih, Diosboó páant át yapat túutũp tajĩ, “Weemjéh wã jenah joyátjĩh wã jéih chãjna caá”, wã níj jenah joicát pínah niijná. Caán, chah wẽpni jumna, wũnah bejnitdih jwũub booani jumna, weemdíh ã teo wáacat pínahboodíh bidat caá náahap. ¹⁰ “Wã jibipboó búdí tobohat ã jumuchah yũhna, Dios ã teo wáacachah, wã túi yapap jĩ. Túttimahbut, biíc yoobó muntih ã túi teo wáacatjĩh wã túi yapbipna caá”, wã níj jéih caá. ¹¹ Yeéb ñi úúbúchah, jwíftdih oinit, Diosboó ã túi teo wáacipna caá. Páant ã teo wáacat doonádih joinít, dawá úúbhñit, “Túina caá, Paá. Pablówádih mat túi teo wáacap wũt be”, wẽinit, ĩ niijbipna caá.

Pablo Corinto tútchiboó ã jwũub bejihat

¹² Biquína ñijeéh jumnit weemdíh yeena caá ĩt chãjap. Obohjeéhtih, tíccanjeh, wẽinit, “Dios ã teo wáacatjĩh ã náahat pahjeh queédih, bitadihbut túinijeh wã pej jum bohénap jĩ”, wã níj jéihna caá. Weém yeeccanjeh, yeebdíh yoobópdih wã naáwáp jĩ. Wã jenah joyátjĩh nihcan, Dios weemdíh oinit, ã teo wáacatjĩh, ñijeéh wã túi jumũp jĩ.

¹³⁻¹⁴ Yeebdíh naóh daácna, bũocannijeh wãpí daácna caá, ded pah wã bohéatdih ñi túi jéihyat pínah niijná. Obohjeéhtih, bũũ wã naáwátidih ñi túi beh joi jwũhcan yũhna, túttimah, ñi túi beh joyát pínahdih yeebdíh búdí

* 1:8 1Co 15.32

wā náah yacna caá. Pánih beh joiná, jwĩ Maáh Jesús ã jwúub dei jũúwúchah, “Pablo jwiít dih ã túi bohénap jĩ”, weemdíh wēinit, caandíh ñi niijbípna caá. Biíc yoobó yeebdíh wēinit, “Wã naóhniji túini doonádih queét ĩ túi jepahap jĩ”, weembút Jesús dih wã niijbípna caá.

¹⁵⁻¹⁶ Páant ñi weñat pínahdih jéihnit, Éfeso tútchiboó jum jwúhna, “Queét Corinto tútchidih moón Jesúhwá dih jwíbí bohénit, Macedonia baácna bohénadilh wã bejbipna caá. Macedonia baácboó jumniiji Judea baácna jwúub bejat túut, queét Corintodilh moondíh chéneji teo wáacat túut niijná, queét dih wã en yap bejbipna caá. ĩ pebh jumni Judea baácboó wã jwúub bejat pínahdih jéihnit, queétboó weemdíh ĩ túi teo wáacbipna caá”, wã niij jenah joyóp yah jĩ. Obohjeéhtih, pánih jenah joiná yúhna, wã jéih bejcap jĩ.* ¹⁷ Ñi pebhna wã bejat pínah doonádih joinít, wã jwíbícah enna, “Pablo nih yáaniabeh tagaá”, ¿ñi niij jenah joí niít? ¹⁸ Páant ñi niij jenah joicá bojoó. Dios ã niijátji pahjeh biíc yoobó ã chājat pah, weembút yeeni nihcan caá.

¹⁹⁻²⁰ Weém, Silas, Timoteojíhbut Dios wúúh Jesucristo ded pah ã chājatjidih yeebdíh jwĩ bohénap jĩ.* Jesucristo nin baácboó ã cáac jumát pínah játih, Diosboó ã wúúh ded pah ã chājat pínahdih át naáwáp wut jĩ. Pánihna, Jesucristo ã íp ã naáwátji biíc yoobó át chājap wut jĩ. “Jújuh Paá, ma chājat túutatdih wã chājipna caá”, át niij jepahap wut jĩ. “Páant wã chājcan niít”, át niijcáp wut jĩ. Pánihna, “Jesucristo chah Maáh caá”, jwĩ niij jéihna caá. Pánih caandíh túi jenah joinít, ã naáwát dih jepahna, Dios dih wēinit, “Yoobópdih tigaá ã niiját”, jwípí niijná caá. ²¹⁻²² Jesucristodilh jwĩ túi jenah joí cádahcat pínah niijná, Dios jwiít dih, yeebdíhbut ã túi teo wáacna caá.

* 1:15-16 Hch 19.21 * 1:19-20 Hch 18.5

Áihwã jwĩ jumat pínah niijná, jwiítdih át ñíwip wut jĩ. Pánih ñíonit, jwiítdih búdí teo wáacat náahna, áih Túini Espíritudih át wahap tajĩ, jwíih caolihboó ã jumat pínah niijná. “Dios pehbhoó ñi jumuchah, yeebdíh chah búdí ã táí chãjbipna caá”, Túini Espíritu jwiítdih ã niijíchah, jwĩ táí jéihna caá.*

²³ Bũũ jwuhna, wã jenah joyátjidih wã jwúub túut nuumátidih yeebdíh yoobópdihi wã naóhbipna caá. Wã yeenachah, Dios wíih jenah joyátidih jéih beedáni, ã peéh chãjbipna caá. Yeebdíh enedih búdí wã bejihna yuhna, “Weemdíh ennit, queét ĩ tíicbipna caá”, niij jenah joinít, ñi pehbhoó bejcanjeh, nin Macedonia baácna wã jwíih juyúp jĩ. ²⁴ Diosdih jepahnit ñi jumuchah, yeebdíh tabit watni dée ñijeéh wã jumíhcan caá. Obohjeéhtih, ñijeéh túinijeh jumna, yeebdíh búdí wã teo wáaquihna caá, Diosdih táí jenah joí cádahcanjeh, chah ñi weñat pínah niijná.

2

¹ Con láa yeebdíh enedih bejna nihna, ñi yéej chãjat peéh jũihna, yeebdíh búdí wãta jígaha tagaá. Pánihna, Éfeso tátchiboó jumna, jib bejatdih jenah joinít, “Queét-dih jwúub jígahaíhcan, ĩ pebhna wã bej jwuhcan niít”, wã niij jenah joyóp jĩ. ² Yeéb ñi jígahachah ennit, weembát búdí wãta jígah tagaá. Pánih míic jígahanit, jwíta míic jéih jwúub weñacan tagaá. ³⁻⁴ Pánihna, ñi pebhna bej jwuhcanjeh, ñi yéej chãjatdih ñi cádahat pínah niijná, wã daác wahap jĩ. Ñi míic ámohat pínah játih bejna nihna, búdí wãta jígahap taga. Pánih búdí jígahna, jũinít, yeebdíh tíicahcan, yeebdíh búdí wã oyatdih ñi jéihyat pínah niijná, páant wã daác wahap jĩ. Jwĩ jwúub míic enna, túut nuumnít, túinijeh ñi jumuchah enna, wã táí

* 1:21-22 Ef 1.14

wēibipna caá. Yeebbút ñi túi wēibipna caá. “Queétboó túi jepahnit, túinijeh ĩ jumbipna caá”, wā niíj jenah joiná caá.

Yéej chājnjidih ĩ jwúub waadát túutat

⁵ Ñijeéh jumni tūbit yéej chājni weemdih ā jīgahanap jī. Yeebdih bácah chah át jīgahanap taga. ⁶ Jáantjeh yeéb míic wáacnit, ā yéej chājat peéh, caandih bacanit, ñit jwúub waadát túutcap wut jī. Páant ñi peéh chājatdih náhninit, ā yéejatdih jīgahna, át túut nūmúp wut jī. ⁷ Bū, ā yéejatdih quib būdnít, caandih ñi míic wáacapboó ñi jwúub waadát túutú. Ā jīgahat yayáchah, jwī Maáhdih ā cádahcat pínah niijná, caandih ñi túi teo wáacá. ⁸ Caandih túinijeh ñi jwúub pej jumúú, “Weemdih ĩ túi oina caá”, wēinit, ā niíj jenah joyát pínah niijná. ⁹ Játih yeebdih daác wahna, “¿Wā wutuchah, ĩ túi jepahmi níit?” niíj jéihíhnit, wā daác wahap jī. Bū ñi jepahatdih jéihna, wā wēina caá. ¹⁰ Bū caán ā yéej chājatjidih ñit jenah joí cádahap wut be. Weembút wā jenah joí cádahna caá. Caán weemdih ā yéej chājcah yuhna, yeebdih teo wáacat túut niijná, Cristo ā enechah, ā yéejatjidih wā jwúub jenah joicán níit. Páant wā jenah joicát dih ennit, yeebbút ñi jenah joí cádahbipna caá. ¹¹ Páant caán ā yéejatjidih jwiútdih jwúub jenah joicát caá náahap, ā tíicat yayáchah, nemép wā ĩ maáh, Satanás, ā náahat pah ā chājcat pínah niijná. Ā yéejatjidih páantjeh jenah joiná, Satanásdih jwíta jepah tagaá. Satanás ded pah jwiít nihatdih ā yéej chājíhatdih jéihcannit jwī nihcan caá.

Titodih jwááhcan, Pablo ā náhni dahwaat

¹² Éfeso tútchimant bejni Troas tútchina juibínit, Cristoíh túini doonádih wā naáwáchah, dawá ĩ túi joyóp jī. “Dios ā teo wáacachah, caandih jepahnit dawá ĩ jumna caá”, wā niíj wēi jenah joyóp jī. ¹³ Páant wā jenah joiná

2 Corintios 2:14 6 2 Corintios 2:17

yuhna, wã ùud panihni Tito, ñi pebhna wã wahnidih jwãáhcan, weémboó búdí wã náhni dahwanap jĩ. Pánih náhni dahwanit, caanjíh moondíh “Wã bejna caá”, niijnít, nin Macedonia baácboó caandíh bididih wã jũúwáp be.*

Cristo jwiít dih eníhcannidih ã yap yohat

¹⁴ Páant wã náhni dahwana yuhna, Cristoíhwã jwí jummatdih jenah joinít, Diosdih búdí wã wěina caá. Cristo Satanásdih yap yohni ã jumuchah, Satanás jwiít dih ã yéej chājat túutuchah yuhna, Cristoíhwã jumna, jwiítbut caandíh yap yohnit jwí jumna caá. Dios nihatdih Cristoíh doonádih jwiít dih ã naáwát túutap be, Satanásdih Cristo ã yap yohatjidih ĩ jéihyat pínah niijná. Pánihna, Cristodih jéihnit, búdí wěinit, nihat caandíh ĩ túi jenah joiná caá.

¹⁵ Cristoíh doonádih jwí naóh peét bejehchah enna, Dios búdí wěinit, “Wã wũúh Cristo panihnit ĩ jumna caá”, ã niíj jenah joiná nacaá. Biquína jwí naóhni túini doonádih joinít, túi jepahnit jumna, iiguípna bejat déejidih Dios ã túi ubnit ĩ jumna caá. Obohjeéhtih, bitaboó, joiná yuhna, ĩ jepahcat peéh iiguípna bejnit pínah ĩ jumna caá. ¹⁶ Nin pah jwípí niíj naóh bohéna caá: “Cristodih ñi jepahcatji peéh iiguípna bejnit, tubit yeejép ñi tubaat ã yaicán niít. Obohjeéhtih, Cristodih túi jepahnit, Dioíh túini pebhboó ñi bejehchah, búdí ñi weñat ã yaicán niít”, jwípí niíj naóh bohéna caá. Páant, jwí niíj naáwáchah joinít, íijnit, biquína ĩ joíhchah yuhna, bitaboó ĩ túi wěi joiná caá. Obohjeéhtih, jwí Maáh Cristo jwiít dih ã teo wáaccach, áih túini doonádih yoobópdih jwí naóhchah, beh joicán, nihat ĩta wěi joicán taga. ¹⁷ Dios naáwát dih bita bohé jibnitboó, jíib náahna, yoobópdih ĩ bohécan caá. Obohjeéhtih, páant ĩ bohéat pah jwiítboó jwí yee bohécan

* 2:13 Hch 20.1

caá. Dios ã naáwát túutnit jumna, caán ã enechah jéihnit, yoobópdih jwípi bohéna caá.

3

Pablowã Jesúihwãdih teo wũhnit i jummat

¹ Bitã i niiját pah, “Dedé jéihcat pínah weemdih wihcan caá”, weémboó wã niicán caá. Yeéb weemdih túi jéihna, “Pablowã yoobópdih ipí bohéna caá”, niij jenah joinít, páant bitã i niij daác wahatdih ñi náahcan caá. Yeebút bitadih páant ñi niij daác wahatdih wã náahcan caá. Obohjeéhtih, bitadih jéihcan, páant daác wahatdih ñita náah taga. ² Yeebdih jwí bohéniji túini doonádih joinít, ñi túut nuumáchah ennit, “Dios ã teo wáacatjih Pablowã queédih i naáwáchah joinít, i jenah joyátdih it túi túut nuumáp taga”, bitã i niij jéihna caá. Páant niij jéihnit, Dios ã bohéat túutnit jwí jummatdihbut i jéihna caá. ³ Pánihna, jwí túi bohénachah, ñi túut nuumátji doonádih joinít, Cristo jwiít dih ã bohéat túutatjidih nihat i jéihna caá. Dios báadhni áih Túini Espíritu ã teo wáacatjih, yeebdih jwí naáwáchah, ñi túi jepahap jĩ. Cristoih doonádih jwí bohénachah joinít, ñi jwíih túut nuumátji doonádih bitã i joyóchah, yeéboó queédih jwí daác wahat panihnit ñi jumna caá.* ⁴ “Cristo jwiít dih ã wun wũhatjih Dios ã túi teo wáacna caá”, ñi niij jenah joyóchah jéihna, jwiít-boó “Túini Espíritu búdí ã teo wáacatjih Dios naáwátdih queédih jwí túi bohénap jĩ”, jwí niij wēi jenah joiná caá. ⁵ Pánih wēinit, “Weém wã jenah joyátjih nindih wã jéih chãjna caá”, niicán, “Dios ã teo wáacatjihjeh wã buujána caá”, wã niij jéihna caá. ⁶ Páant ã teo wáacatjih áih jáap naáwát, túini doonádih wã túi naóhna caá. Jon játih Dios jeé naanádih ã daacátjidih jwí nuowãdih át jepahat túutur

* 3:3 Ex 24.12; Jer 31.33; Ez 11.19; 36.26

wut jĩ. Obohjeéhtih, caán máa wutatdih ĩ túi jepahat pínah wēpat queétboodíh át wihcap wut jĩ. Nin jáap naáwátboodíh jwĩ jepahat pínah niijná, Túini Espíritu jwiít dih ā teo wáacna caá, Diosjeéh jwĩ túi jummat pínah niijná.*

⁷⁻⁹ Dios ā wutatdih jeé naanádih daácnit, Moisésdih ā wūhuchah, Dios ā wēpatjĩh Moisésh mót búde át yeh iiguíp wut jĩ. Moisés jeemánt ā jwúub dei jūúwúchah, áih mót yeh iigát ā baáj jwúub bejehchah yuhna, quíib ihana, queét Israel jummenáji caandíh ĩt jéih encap wut jĩ.* Jon játih Dios ā daácnit wutatdih ā wūhuchah, ájeéh ĩ túi jummat pínah niijná, caandíh túi jepahat át náahap wut jĩ. Obohjeéhtih, ĩ túi jepahcatji peéh iiguípna ĩt bejep wut jĩ. Páant ĩ jepahcah yuhna, Moisés ā naóhni wutat túini ā jummatdih júutna, Dios búde ā yeh iigát át jígohop wut jĩ. Búú láa jáap naáwát, túini doonádih Dios ā naáwát túutuchah, Túini Espíritu jwĩ jepahat pínahdih ā teo wáacachah, chah túini jumna, chah yeh iigát panihni ā jumna caá. Caán jeé naanádih ā daácnit wutatdih jwĩ túi jepahcatji peéh iiguípna jwíta bej taga. Caán wutatdih jepahcan, ájeéh jwĩ jéih jumcah yuhna, caán wutatdih ā wūhuchah, Dios ā túi yeh iigát át jígohop wut jĩ. Obohjeéhtih, búú láa Jesucristoíh túini doonádih jwĩ jepahachah, iiguípna jwĩ bejat déejidih, Túini Espíritu ā teo wáacatjĩh Diosjeéh jwĩ túi jumna caá. Pánihna, jáap dooná chah túini caá ā jumap. ¹⁰ Búú láa Jesucristoíh dooná jwiít dih búde yeh iigní dée ā jumna caá. Obohjeéhtih, Moisésdih Dios ā daác wūhni wutat jwiít dih yeh iigcánni dée ā jumna caá. ¹¹ Caán wutatdih ā wūhuchah, búde yeh iigát maátcanjeh át jum jwuhap wut jĩ. Pánihat pah, caán wutat túini jumna yuhna, búúdní pínah át jumap tajĩ. Obohjeéhtih,

* 3:6 Jer 31.31 * 3:7-9 Ex 34.29

Jesucristoíh túini doonáboó ã bũudcán niít. Búdí yeh iigát ã jumũchah yũhna, máa wũtatji bũudní pínah ãt jumũp tajĩ. Pánihna, bũudcánni pínah jáap doonádih ã wũhũchah, chah búdí yeh iigát dée ã jumna caá.

¹²⁻¹³ Moisés áih móot yeh iigát ã baáj jwũub bejehah, yégueh chóojĩh ãt jáhap wũt jĩ, queét Israel juméná ĩ encat pínah niijná. Obohjeéhtih, jwiítboó nin bũudcánni dooná chah iigní dée ã jumũchah jéihna, tíccanjeh, yoobópdih jwĩ naóhna caá.* ¹⁴ Queét Diosdih joífhcan, ĩih jenah joyátdih jáhat dée ã jumũchah, Moisés ã daacátjidih ĩt beh joicáp wũt jĩ. Bũũ páantjeh caán daacátjidih ĩ en naáwáchah joiná yũhna, biíc yoobó ĩ jéih beh joicán caá. Cristodih jwĩ jepahachahjeh, caán jáhat déedih ã yohna caá. ¹⁵ Yeebdíh wã jwũub naóhna caá. Bũubũt queét Israel juméná jwĩ Maáh Cristodih jepahcan, Moisés ã daacátjidih páantjeh ĩ beh joicán caá. ¹⁶ Obohjeéhtih, det jwĩ Maáhdih jepahnitdih caán daacátjidih Jesúsboó ã túi beh joyána caá. ¹⁷ Jwĩ Maáhdih jepahnitdih Túini Espíritu ã jumna caá. Pánihna, jwiít Túini Espíritu jumnitdih Diosboó wēi ennit, “Queét yéejat peéh chájat wihcannit caá”, ã niijíchah joinít, “Moisés ã wũtatjidih jwĩ túi jepahcatji peéh jwiítidih ã wihcan niít”, jwĩ niij jéihna caá. Pánih jumna, jáhat dée wihcah, Diosdih túi jéihnit, jwĩ mũm mũbhcan caá. ¹⁸ Jwiít Cristoíhwã móot jáhat dée wihcan, “Caánboó chah túini caá”, jwĩpĩ niij jenah joiná caá. Páant niij jenah joinít, ã weñat pínahdihjeh chájna, caán ã jummat pahjeh jummat túut niijná, yeó jáap jummat pah túi túut nũumná caá jwĩ chájap. Jwiítidih Túini Espíritu ã teo wáacachah, jwĩ túi túut nũumná caá. Pánih túinidih jwĩ túut nũumũchah ennit, “Queét chah túi jenah joiná caá ĩ chájap”, bitaboó jwiítidih ĩ niij jenah joibpna caá.*

* 3:12-13 Ex 34.33 * 3:18 Ro 8.29; Gá 4.19; Fil 3.10

4

Jesúih doonádih naóhnit ded pah ī jumat

¹ Túini Espíritu teo wáacni jumna, Dios weemdíh oinit, áih jáap túini doonádih ā bohé jibat túutap jī. Pánih bohéna, bita weemdíh yeejép ī chājachah, jíghana yuhna, wā bohé cádahcan caá. ² Ded pah wā bohéát dih nihat ī jéihyat pínah niijná, wāpí bih bohécán caá. Nihat joinít ī túi beh joyát pínah niijná, yeecanjeh, áih túini doonádih yoobópdih wāpí bohéna caá. Dios weemdíh wēi ennit, “Pablo ā túi bohéna caá”, ā niijná caá. Bitabut wā bohénachah joinít, bíic yoobó ípí niijná caá. ³ Obohjeéhtih, bita iiguípna bejnit pínah jumna, jāhat dée ā jumuchah, wā bohéát dih ī beh joicán caá. ⁴ “Cristo chah túini Maáh ā jumna caá”, jwī níj bohénachah, Diosdih jéihcannit ī maáh, Satanás queétdih ā beh joyát túutcan caá. Áih yeh iigátdih jāhat dée pah caá queétdih ā chājap. Dios ded pah ā jumatdih Cristojeh cáacwādhīh ā túi beh joyána caá. Caán Cristo Dios yoobát caá. ⁵ Pánih bohéna, “Weemdíh ñi weñeé”, niijcánjeh, “Jwī Maáh Jesucristoboodíh ñi weñeé”, wāpí níj naóh bohéna caá. Jwiít Jesús dih oina, ñi maáh dée nihcan, yeebdíh teo wáacnitjeh caá jwī jumap. ⁶ Jon játih Dios nihatdih chājna, “Dúpúnapboó yeh iigát ā jumna naáh”, āt niijíp wut jī. Caanjéh jwíih caolihdih yeh iigát dée ā jumat túutna caá. Pánihna, Cristo, chah túini ā jumatdih jéihna, Dios bíic yoobó túini ā jumatdihbut jwī jéihna caá.*

Jesúihwā áih wēpatjīh ded pah ī chājat

⁷ Weémboó wēpcanni, oboh jumni wáam dah dée wā jumuchah yuhna, Jesucristoíh túini doonádih wā bohé

* 4:6 Gn 1.3

jibat pínah niijná, Dios weemdíh ã ñíwip jī. Oboh j̄um̄ni wáam dah díitboó chah túinidih jwīpí yac ámohat dée wā bíbohna caá. Caán túini doonádih wā naáwáchah joinít, cáacwāboó ĩ túut n̄um̄ná caá. “Oboh j̄um̄ni, wēpcanni wā j̄um̄chah ȳuhna, Diosboó chah wēpni j̄um̄na, búdí ã teo wáacachah, ĩ túi túut n̄um̄úp be”, wā niíj jéihna caá. Bitabut, wēpcanni wā j̄umatdih jéihna, “Dios ã wēpatj̄ih ĩ túut n̄um̄úp be”, bíic yoobó ĩ niíj jéihna caá.

⁸ Biquí láana weemdíh t̄ubit ĩ j̄ūih̄uchah ȳuhna, Jesúih túini doonádih wā naóh cádahcan caá. Bíih láa ded pah Dios ã weñat pínahdih jéihcanjeh, “¿ded pah wā chājbi?” niijnít, búdí wā jenah joiná caá. Pánih búdí jenah joiná ȳuhna, weemdíh ã teo wáacachah, caandíh wā túi jenah joí cádahcan caá. ⁹ Bíih láa bita weemdíh eníhcan, Jesúih túini doonádih wā naáwát peéh, yeejép ĩ chājna caá. Páant yeejép ĩ chājachah ȳuhna, weemdíh cádahcanjeh, Dios āpí teo wáacna caá. Bíih láa ĩ w̄un mao jwejni ȳuhna, ã teo wáacachah, booni páantjeh wā j̄um̄na caá. ¹⁰⁻¹¹ Nin baácboó Jesús ã j̄um̄ jw̄uhchah, cáacwā caandíh ĩt mao yohop w̄ut jī. Pánihna, weembút nin baácboó j̄um̄ jw̄uhna, Jesúsdiĥ ĩ mao yohatji pahjeh, áih túini doonádih wā naóh jibat peéh, weemdíhbut ĩ mao yohíhna caá. Obohjeéhtih, Jesucristo weemdíh ã túi wapachah, wā báadh jw̄uhna caá. Páant weemdíh ã teo wáacachah enna, “Jesúsboó báadhni, chah wēpni ã j̄um̄na caá. Caanjéh tigaá Pablodih wapni”, niĥat cáacwā ĩ niíj jéihna caá. ¹² Weemdíh ĩ mawíhichah ȳuhna, yeéboó wā naóhni doonádih joinít, Jesucristodih jepahna, Diosjeéh páantjeh ñi túi j̄umbipna caá. ¹³ T̄ubit yeejép yapna ȳuhna, Jesucristodih wā túi jenah joí cádahcan niít. Jon játih Davidbut yeejép ã yapachah, nin pah át niíj daacáp tají: “Diosdih túi jenah joinít, ded pah ã naáwátidih wā naóh yapanap be”, át niíj

daacáp tajī.* ã túi jenah joyát pah muntih weembút jwī Maáhdih túi jenah joinít, áih túini doonádih wāpí naóh yapana caá. ¹⁴ Pánihna, Jesúh túini doonádih wā naáwát peéh bita weemdíh ĩ mao yohochah yuhna, caandíh wā túi jenah joí cádahcan niít. “Jesucristoíh jumna, caandíh jwúb boaniboó weemdíhbut ã jwúb boobipna caá. Pánih boanít, weemdíh ñijeéh ã jumrpoó ã waadát túutbipna caá”, wā niíj jéihna caá. ¹⁵ Páant ã chājat pínahdih jéihnít, yeebdíh teo wáacat túut niijná, yeejép yapna yuhna, wāpí bohéna caá. Wā bohéatdih dawá ñi joyóchah, yeebdíh oinit, Dios dawá iiguípna bejnít déejidih ã túi ubna caá. Pánihna, dawá caandíh “Túina caá, Paá”, ĩ niíj wēi naóhbipna caá.

¹⁶ Páant jwítdih ã chājat pínahdih náhninit, búdí wēina, Jesúh túini doonádih wā yabh naóhcan caá. Yeó jáap jumát pah wíh bácah ã wēpca jūwúchah yuhna, caandíh chah túi jenah joiná caá wā chājap. ¹⁷ Nin baácboó jwī jum jwuhachah, yeejép jwī yapatdih búdí wā jenah joicán caá. Obohjeéhtih, Dios pebhboó jwī juibínachah, yeejép yapat wihcah, chah túi wēinit jwī jumát pínahdih wā túi jenah joiná caá. ¹⁸ Nin baácboó jum jwuhna, dedé jwī enni buudní pínahjeh caá. Obohjeéhtih, Dios pebhboó jumnidih buu jwī jéih encah yuhna, ã buudcán niít. Pánihna, nin baácboó jwī ennidih búdí jenah joicánjeh, Dios pebhboó ded pah jwī jumát pínahdih wā túi wēi jenah joiná caá.

5

¹ Nihat nin baácboó jumni buudní pínah ã jumát dih jéihna, “Jwíh bácahbut buudní pínah ã jumna caá”, jwī niíj jéihna caá. Jwī wunuchah, jwíh bácah ã moórbipna

* 4:13 Sal 116.10

caá. Obohjeéhtih, jwĩ wənat túttimah, Dios jáap bácah jwiít dih ã jwúub wəh b ipna caá. Caán bácah jĩh jwĩ jwúub wəncan niít. “Pánih jumna, jáap bácah jĩh Dios pebhboó jwĩ jum b ipna caá”, jwĩ niíj wēi jenah joiná caá. ² Nin baácboó jum jwəhna, tūbit yeejép yapna, biquí láana Dios pebhboó búdí wã jum íhna caá. ³ Yégueh chóodih jwĩ dəwíhat pahjeh ã wəhni pínah jáap bácah boodíh búdí wã páina caá. ⁴ Bəu nin bácah dih yohíhcan yəhna, jáap bácah boodíh wã páina caá. Nin baácboó jum jwəhna, wíih bácah ã moopát pínah dih jéihna, Diosjeéh páantjeh jum at túut niijná, jáap bácah pínah dih búdí wã bidna caá. ⁵ Dios jwiít dih jáap bácah ã wəhat pínah dih játih át jenah joiíj p taga. Pánihna, áih Túini Espíritudih jwiít dih ã wəhuchah, caánboó “Yoobópdih jáap bácah dih meemdíh ã wəh b ipna caá”, jwiít dih ã niíj jenah joyát túutna caá.

⁶ Páant ã chājat pínah dih jéihnit, úumcan, wã jíghacan caá. Bəu nin bácah jĩh jum jwəhna, Dios pebhboó wã bej jwəhcan caá. ⁷ Pánih jumna, ded pah jwĩ yapat pínah dih jéih encan yəhna, Jesucristodih túi jenah joinít, “Á niijátji pahjeh wã túi yap b ipna caá”, wã niíj jéihna caá. ⁸ Nin baácboó jum jwəhna, wã wənat pínah dih úumcanjeh, wēi jenah joinít, jáap bácah jĩh jwĩ Maáh Jesucristojeéh búdí wã jum íhna caá. ⁹ Pánihna, Dios pebhboó bejna, wã bej jwəhcanbut, biíc yoobó jwĩ Maáh ã weñat pínah dih jeh wã chājíhna caá. ¹⁰ Japboó juibínit, jwiít nihat jwĩ Maáh Jesucristo pebhna jwĩ juibí ñəh b ipna caá. Páant jwĩ juibí ñəhuchah, nin baácboó jumna, ded pah jwĩ chājatjidih enniji jwĩ maáh ã ñíobipna caá. Páant ã ñíwichah, jwĩ jéih jweicán niít. Pánihna, biíc jwĩ Maáh ã weñat pínah dih ã túi chājatji jíib, ã túi wēi naóh b ipna caá. Obohjeéhtih, biíhboó ã túi chājcatji jíib, caandíh ã wēican niít. Páant

jwĩ yapat pínahdih jéihna, jwiít dih túi chājat caá náahap.*

Dios jwiít dih ã wēi enat

¹¹ Dios ninboó ded pah jwĩ chājat dih enna, caán ã weñat pínahdih jwĩ chājat ji júb ã peéh chāj bipna caá. Páant ã peéh chājat pínahdih úum yacna, búdí teo wáaquíhna, cáacwādih wã wēp bohéna caá. Pánih bohéna, búdí oinit, wã teo wáaquíhat dih Dios ã túi jéihna caá. Pánihna, bíc yoobó ñi jéihyat pínahdih yeebdíhbut wã náah yacna caá. ¹² Páant niijnít, “Dedé jéihcat pínah weemdíh wihcan caá”, wã niijcán caá. Obohjeéhtih, bitaboó ã yee naáwáchah joinít, “Nihcan caá. Pablo túi oinit, yoobópdih jwiít dih ã bohéna caá”, ñi niiját pínah niijná, páant wã niij naáwáp be. Queét ã túi jígoat dihjeh wēi jenah joinít ã jumna caá. “Nihat jwiít judíowã ded pah jwĩ chājat dih Pabloboó joyáh bojna, ã bohéat túican caá”, ã niij naóhna yuh caá. Páant niijnít, bita queétdih ã wēi enat pínahdihjeh ã jenah joyát ã túican caá. Obohjeéhtih, ded pah íih caolih ã jumat dih caá jenah joyát náahap. ¹³ Biquína weemdíh jūihnitboó “Pablo tūbit yójah bohé jibna, jenah joicánni caá”, ã niij jūihna caá. Obohjeéhtih, Diosdih búdí weñáihna, páant wã bohé jibna caá. Bitaboó weemdíh eníhcanit, “Pablo ã jenah joyátjéh ã yee bohé jibna caá”, ã niijná yuh caá. Obohjeéhtih, yeebdíh teo wáacat túut niijná, túi jenah joinít, yoobópdih wã bohéna caá. ¹⁴ Cristo jwiít dih búdí ã oyochah jenah joinít, caandíh jepahna, wã túi bohéna caá. Pánih oina, caán Cristo bícjeh jwĩ yéejat júb buudáát dih ã júb chāj beedá wūhat túut niijná, jwiít dih át wun wūhup wut jí. Caandíh jenah joiná, “Wíih pínah caá át wun wūhjp taga”, niij jenah joinít, jwiít nihat jwĩ yéejat júb ájeéh wūnnit panihnit caá jwĩ jumup. Jwĩ yéejat júb buudáát dih júb chāj péanit

* 5:10 Ro 14.10

panihnit jwĩ jumna caá. ¹⁵ Pánihna, Cristo nihat cáacwã jwĩ yéejat jíib át wun wũhup wut jí, caandíh jepahnit, jwĩ náahat pah chãjnitji túut nũumnít, ã weñat pínahboodíh jwĩ chãjat pínah niijná. Caán ã wunuchah yuhna, Dios át jwũub booanap tajĩ.

¹⁶ Jwĩ Maáhdih jwĩ jepahachah, ded pah jwĩ jenah joyátdih ã túut nũumúp be. Játih nin baácdih bóodih jenah joinít, ded pah cáacwã ĩ jígoahdihjeh ennit, “Túinit caá. Yeejépwã caá”, jwĩ niij en jwuhup be. Obohjeéhtih, bũũ páant jwĩ niij jenah joicán caá, bũca. Játih Cristodihbut pánih jenah joinít, “Caánboó cáacjeh caá”, wã niij jenah joyóp yuh jí. Bũũ caandíhbut páant wã niij jenah joyátjidih wã túut nũumúp be. ¹⁷ Ded Jesucristodih jepahni, áih jumna, jenah joyát túut nũumní ã jumna caá. Ded pah ã jenah joyát túut nũumná, ded pah ã chãjatbut túut nũumní ã jumna caá. Játih ã weñat pínahdihjeh chãjni ã jumup be. Bũũ, túut nũumná, Túini Espiritu ã teo wáacachah, Dios ded pah ã weñat pínahboodíh chãjni ã jumna caá, bũca.* ¹⁸ Jwiítjeh páant jwĩ jéih chãjcah, Dios jwiít dih át túut nũumúp taga. Játih, Diosdih eníhcannit jum jwuhna, ãjeéh jwĩ túi jum jwuhcap jí. Cristo ã wun wũhatjih jwĩ eníhcatdih Dios át cádahat túutup taga, ãjeéh jwĩ túi jumat pínah niijná. Pánih chãjnit, jwiít dih bitadih át naáwát túutup be, queébtut caandíh ĩ eníhcatdih cádahnit, ãjeéh ĩ túi jumat pínah niijná. ¹⁹ Nin pah caá ã niij naáwát túutup: “Nihat yéejnit jumna, Diosdih eníhcannit jwĩ jumna caá. Jwiít dih búdí bidnit, Jesucristo jwĩ yéejat jíib ã wun wũhatdih jwĩ túi jenah joyóchah, áihwã chãjnit, jwiít dih ã túi pej jumna caá”, ã niij naáwát túutup jí. ²⁰ Pánihna, Jesúfh

* 5:17 Jn 3.3-7; Gá 6.15

jumna, cáacwādh nin pah wāpí niy naóh yapana caá: “Yeebbút Jesucristodih jepahna, túut nuumnít, Diosjeéh ñi túi jumúú”, wā niijná caá. ²¹ Jwī Maáh Cristoboó biícjeh yéejat wihcanni át jumup wut jī. Obohjeéhtih, ā yéej chājcah yuhna, Diosboó caandíh jwī yéejat jíib át wun wūhat túutap wut jī. Jwī yéejat jíib buudáátdih Cristoboó át jíib chāj beedá wūhup wut jī. Páant ā jíib chāj beedá wūhatdih enna, Diosboó jwiít Cristofhwādh ennit, “Queétdih dedé yéejat peéh ā wihcan caá. Wā wūhdíh wēi enat pahjeh mūntih, queétdihbut wā wēi enna caá, buca”, ā niijná caá. Pánihna, Cristofhwā jwī jumuchah, Dios túini ā jumat pahjeh mūntih jwiítdihbut ā túi jumat túutna caá.

6

¹ Dios yeebdíh búdí oinit, teo wáacna, ñi yéejat peéh át yoh wūhup taga. Jwiít, yeebbút Diosdih teo wūhnit jumna, nindih yeebdíh wā naóhna caá: Áihwā jumna, yeebdíh wā bohéatjidih ñi túi jepahaá. “Wā jepahna caá”, niijná yuhna, ā náahat pah chājcan, dedé pínah āta nihcan tagaá. Dios ā oyatdih yap yohnitjeh ñita jum tagaá. ² Jon játih Dios naáwátdih naóh yapani nin pah át niy daacáp tajī:

“ Wā náahni yeó jáap yeebdíh búdí oina, ñi wūbátdih jepahnit, wā teo wáacap jī. Pánih teo wáacnit, yeebdíh wā túi ubup jī, Dios ā niijná caá”, át niy daacáp tajī. *(Is 49.8)*

Buu caá ā náahni yeó jáap ā jumup. Bui yeebdíh ā túi ubat pínah niijná, caandíh jepahat caá náahap.

Ded pah Pablo ā jumat

³ “Bita wā bohéatdih ī jepahcan niít”, niijná, dedé yeejép chājcan, yeejép wāpí wéhecan caá. ⁴ Túinijeh

wǎpí j̄mna caá, “Pablo Dios ã weñat pínahdihjeh chǎjna, caandíh túi teo wǎhni ã j̄mna caá”, cáacwǎ weemdíh ĩ niiját pínah niijná. Dawá láa bita weemdíh yeejép ĩ chǎjachah yuhna, weémboó íjcanjeh wǎ j̄mna caá. Dawá láa moh yéejna yuhna, wǎ bohé cádahcan caá. ⁵ Nin pah caá yeejép wǎ yapap: Cáacwǎ weemdíh ĩ mawachah; nemat muúboó ĩ nemechah; dawá íjnit, míic wáac j̄uinít, ĩ mao yohat túutuchah, yeejép wǎ yapap j̄i. Weém búdí teona; quíib chei tubachah yuhna, ñoca daa j̄óhna; nuugúr wunna, yeejép wǎ yapap j̄i.* ⁶ Í náah chǎjatdih jenah joicán, wǎ túi j̄mna caá. Yeebdíh teo wáaquíhna, jwí maáíh túini doonádih túi jenah joinít, íjcanjeh, wǎ túi bohénap j̄i, ñi túi beh joyát pínah niijná. Yeebdíh túi oinit, wǎ bohénachah, Túini Espíritu yeebdíh ã teo wáacatj̄ih ñi túi jepahap j̄i. ⁷ Áih túini doonádih naóhna, yeecanjeh, Dios ã wēpatj̄ih wǎ bohénachah enna, caandíh teo wǎhni wǎ j̄umatdih ñi túi jéihna caá. Yoobópdih Dios ã weñat pínahdih chǎjna, “Pablo yeejép chǎjni caá”, cáacwǎ weemdíh ĩ jéih niijcán caá. “Dios ã náahat pah, túinijeh ñi j̄muú”, bitadih wǎ niijíchah, wǎ túi j̄umatdih enna, “Pablo yee bohéna caá ã chǎjap”, ĩ jéih niijcán caá. ⁸ Biquína weemdíh ĩ túi wēi enechah, bita ĩ wēi encah yuhna, biquína ĩ wēi naáwáchah, bita yeejép ĩ naáwáchah yuhna, wǎ joyáh bojna caá. Yoobópdih wǎ bohénachah yuhna, biquína “Pablo yee bohéni caá”, ĩ níj naóh yacna caá. ⁹ Nihat cáacwǎ ĩ enepboó wǎ bohénachah, weemdíh jéihna yuhna, biquína weemdíh enah bojnít, “Oboh j̄umnijeh caá”, ĩ niijná caá. Bita weemdíh ĩ mawachah yuhna, wǎ báadh jwuhna caá. ĩ mao yohat túutuchah yuhna, páantjeh wǎ j̄um jwuhna caá. ¹⁰ Biquí láana jíghna yuhna, Cristoíh j̄mna, páantjeh wǎ wēina

* 6:5 Hch 16.23

caá. Moh yéejni jumna yuhna, bitadih túini doonádih bohéna, queétdih búdí jíib jumni wúhat dée pah caá wā bohénap. Bíih pah bóonadih bíbohcan yuhna, Cristoíh jumna, búdí bíbohni dée pah wā wēina caá.

¹¹ Yeéb Corinto tútchidih moondíh búdí oina, úumcan, tíccanjeh, ded pah yeebdíh búdí wā náah yacatdih wā túi naóh daác beedánap be. ¹²⁻¹³ Yeéb wā weh panihnit ñi jumuchah, oinit, yeebdíh wā naóhna caá. Yeebdíh wā oi cádahcan caá. Obohjeéhtih, yeébboó weemdíh ñi oi cádahap jí. Pánihna, yeebdíh búdí wā oyat bíic yoobó weemdíhbut ñi jwáub oyoó.

Jesucristoíh nihcannitdih ã pej jummat tútcat

¹⁴ Yeéb Jesucristoíhwā áihwā nihcannitboodíh ñi pej jumca bojoó. Túi pej jumnit pínah nihcan caá. Nindih ñi túi jenah joyoó: Ded Jesúsdih jepahni, túinidih ápi chájíhna caá. Obohjeéhtih, Jesúsdih jepahcanniboó, yeejépdih ápi chájina caá. Pánih jumna, bíicdih í jéih jumcan caá. Yeejép chájni túi chájíhniboodíh ã yeejabipna caá. Túi chájíhni yeejépdih ã jéih yap yohcan níit. Ded Jesúsíh jumna, ã naáwátidih ápi túi jenah joiná caá. Obohjeéhtih, Jesúsíh nihcanniboó nemépwā í maáh ã naáwáchah joinít, ded pah Dios ã jummatdih ã jéihcan caá. Queét chénat pah í jenah joyát mácah ã jumna caá. Pánih jumna, í jéih míic pej jumcan caá. ¹⁵ Jesucristo Satanásjíh mácah míic í jenah joyát ã jumuchah, í jéih míic pej jumcan caá. Bíic yoobó Jesúsíhwā Satanáíhwājíhbut mácah míic í jenah joyát ã jumuchah, bíicdih í jéih jumcan caá. ¹⁶ Dios páantjeh jumni caá. Jwiít áihwā jumna, caandíhjih wēinit, jwí jepahna caá. Bííhdih wēinit, jepahna, áta túican tagaá. Jwiít Jesúsíhwā áihwā nihcannitdih pej jumna, í wēi jepahnidih jwiítbut jwí wēi jepahat dée ã tobohna caá. Pánih jumna, yeéb Jesúsíhwā, Jesúsíhwā nihcannitdih ñi pej

jumca bojoó. Dios báadhni jumna, jwiít Jesúíhwā bíicdih, áih m̄ pánihnit jwī jumna caá.* Jon játih ā naáwátdih naóh yapanit nin pah ít níj daacáp tajī:

“ Weémboó queétdih túi pej jumna, ī maáh wā jum-bipna caá. Queétboó wííhwā jumna, weemdíhjuh ī wēibipna caá’, Dios ā niijná caá”, ít níj daacáp tajī. *(Lv 26.12; Jer 32.38; Ez 37.27)*

¹⁷ Bitá naóh yapanitbut nin pah ít jwíub níj daacáp tajī:

“ Wííhwā nihcannitdih ñi cádahaa. Queétdih ñi pej jumca bojoó. Í náah ī chājat déedih yeéboó ñi chājca bojoó. Páant ñi cádahachah, weémboó yeedíh wā wēi enbipna caá. *(Is 52.11)*

¹⁸ Pánih wēi ennit, ñi íp wā jum-bipna caá. Yeéboó wā weh ñi jum-bipna caá’, Chah Wēpni Maáh ā niijná caá”, ít níj daacáp tajī. *(2S 7.14; 1Cr 17.13; Is 43.6; Jer 31.9)*

7

¹ Pánihna, wā oinitá, nindíh ñi túi jenah joyoó: “Ñi yéej chājatdih ñi cádahachah, yeedíh wēi ennit, wā túi pej jum-bipna caá”, Dios ā niijíchah joinít, nihat jwī yéejatdih jwī cádah jííh. Dios ā jígahat pínahdih chājíhcan, yeejép jwī jenah joyát-dih cádahat caá náahap. Pánih túut n̄m̄nít, túi jenah joiná, ā weñat pínahboodíh jwī chāj jííh.

Corinto tútchidih moón ī túut n̄m̄mát

² Weedíh ñi jwíub oi jenah joyoó, páant m̄ntih. Níjeéh jumna, deddih wā yéej chājcap jí. Bohéna, yeedíh wā yéej chājat túutcan, yeedíh wā yee dúuc wáicap jí.

³ Páant niijnít, “Pablodih jwī túi oicatji jíib jwiítdih peéh chājat ā jumna caá”, yeedíh níj jenah joyát túutcan, “Pablo túi chājni jíí”, wā níj jenah joyát túutna caá. Wā

* 6:16 1Co 3.16; 6.19

Ƶwíh níjájti pahjeh muntih, wā Ƶwúub níjíná caá: Yeebdíh búdí wā oina caá. Pánihna, ded pah yapna, wunna yuhna, bíc yoobó yeebdíh jenah joinít, wā oi cádahcan níft. ⁴ “Queét Corintodih moón túi chājnit Ƶumna, wā naáwát dih í túi jepahbipna caá”, níj jenah joinít, búdí wā wēina caá. Pánihna, yeejép yapna yuhna, yeebdíh páantjeh wā wēi jenah joiná caá.

⁵ Nin Macedonia baácboó wā Ƶyúchah, weemdíh chooát ā wihcap be. Páantjeh yeejép wā yapap be. Dawá Ƶúihnitboó “Ma túi chājcan caá”, weemdíh í níj Ƶúihñup be. “¿Queét Corintodih moón wā oinitboó í túi Ƶum níft?” níj jenah joinít, páantjeh yeebdíh búdí wā náhni dahwanap be.* ⁶ Obohjeéhtih, Dios Ƶígahat yayániboó weemdíh teo wáacnit, Tito wā pebh ā Ƶyúchah, weemdíh búdí ā weñanap be. ⁷ “Queét í Ƶwúub túi Ƶumatdih enna, búdí wā weñep be”, weemdíh Tito ā níj naáwáp be. Páant ā níj naáwáchah joiná, weembút búdí wā weñep be. “Queét Corintodih moón Jesúíhwā meemdíh búdí í bidna beé. ‘Yéej chājnit, Pablodih búdí Ƶwít Ƶígahanap taga’, níj jenah joinít, queébtut búdí ít Ƶígahap wut be. Pánih Ƶígahnit, ma daác wahnidih ennit, ít túi jepahap tabe”, Tito weemdíh ā níj naáwáchah joinít, chah búdí wā weñep be.

⁸ Wā Ƶwíh daácnijidih wah péanit, “Nin wā wēp naóh daacátjidih ennit, búdí í Ƶígahbipna caá. Páant wā wēp naóh daáccan, āta túi taga”, níj jenah joinít, búdí wā Ƶígah Ƶwuhup Ƶí. Obohjeéhtih, buu ñi Ƶígahat yayát doonádih joinít, weembát wā Ƶígahcan caá. ⁹ Buu búdí wā wēina caá. Ñi Ƶígahat doonádih joinít, wēina wā chājcan caá. Obohjeéhtih, Ƶígahnit, táiniboodíh ñi túut nuumát doonádih

* 7:5 2Co 2.13

joinít, búdí wā wēina caá. Dios caá yeebdíh át jíghat túutup taga, ñi jenah joyátdih ñi túut nuumát pínah niijná. Pánihna, wā daác wahniboó yéejacan, yeebdíh át túi teo wáacap taga. ¹⁰ Dios ā náah yacat pahjeh jwī yéej-
 jatdih jíghahna, yéej chājatdih jwī cádahbipna caá. Pánih jíghahna, jwī jenah joyátdih túut nuumnít, táiniboodíh jwī chājibipna caá. Páant jwī túut nuumúchah enna, iiguípna jwī bejat déejidih Diosboó ā túi ubbipna caá. Maátcanjeh jwī jíghahna yuhna, túi túut nuumnít, búdí jwī wēibipna caá, buca. Obohjeéhtih, bitaboó ī yéej chājat jíib queétdih Dios ā peéh chājat pínahdih jíghahna yuhna, túut nuúmíh-can, iiguípna ī bejbipna caá. ¹¹ Yeéb Dios ā náah yacat pahjeh jíghahnit, ñit túi túut nuumúp taga. ¡Ñi jenah joyoó! Nin pah caá ñi túut nuumát: Buu jwuhna, ded yéej chājni ā yéejatdih enah bojcanjeh, yoobópdih ñi túut nuumát túutna caá. Ñi yeejép jenah joyátjidih cádahnit, túut nuumnít, buu ñi túi jenah joyátdih wā jéihyat pínahdih weemdíh ñi náah yacna caá. Pánihna, weemdíh ñi wēi jenah joi jwúhcatjidih búdí ñit jíghap wut be. Ñi yéejat jíib Dios ā peéh chājat pínahdih búdí úumna, túi túut nuumnít, weemdíh jwúub eníhna, búdí ñit bidip wut be. Dios ā weñat pínahdihjeh ñit chājap wut be. Det yéej chājnitdih ñit peéh chājap wut be. “Buu, queét yoobópdih chājnit caá. Dedé yéej chājat peéh queétdih ā wihcan caá, buca”, wā níj jenah joiná caá. ¹² Yeebdíh daác wahna, yéej chājnidih ñi peéh chājat pínahdih, ā yéej chājatjidihbüt jenah joicánjeh wā daác wahap jī. Obohjeéhtih, Dios yeebdíh enna, “Queét Pablodih yoobópdih oinit caá”, ā níj jenah joyátdih ñi túi jéihyat pínah niijná, wā daác wahap jī. ¹³ Páant ñi túut nuumátidih jéihnit, búdí wā wēina caá.

Tito ninboó jwúub jwinít, weemdíh nin pah ā níj wēi

naawáp be: “Queét Corintodih moón ĩ túi túut nuumátidih ennit, wā jígahatji ā yayáh bejep jī. Pánihna, búdí wā wēina caá”, ā niijíp be. Páant ā niijátidih joinít, weembút chah yeebdíh wā wēina caá. ¹⁴ Tito ñi pebhboó ā bejat túut chājachah, nin pah caandíh wā niijíp jī: “Queét Corintodih moón Jesúíhwā nin wā daác wahnidih ennit, ĩ túi jepahbipna caá”, wā niijíp jī. Pánihna, ñi túi jepahatjidih jéihnit, Titodih jwáub ennit, wā tíccap be. Titodih wā niijátji bíic yoobó át yapap wut be. ¹⁵ Tito ñi pebhna ā juibínachah, caandíh túi wēi jwááhnit, wā daác wahatdih ñi túi jepahatdih náhninit, yeebdíh chah ā oi jenah joiná caá. ¹⁶ Bwú túi jepahnit, Dios ā weñat pínahdíhjih ñi túi chājatdih jéihna, táttimah bíic yoobó ñi jepahat pínahdíhbut wā túi jéihna caá. Pánih jéihnit, búdí wā wēina caá.

8

Jesúíhwā dinero wahnit, moh yéejnitdih ĩ teo wáacat

¹ Bwú wā úudwā panihnitá, bíih naawát ā jumna caá. Nin Macedonia baácđih jumni tútchinadih moón Jesúíhwā míic wáacnit ded pah ĩ túi chājatjidih yeebdíh wā naóhbipna caá. Dios queéđđih oinit, búdí át teo wáacap taga. ² Queét tubit yeejép yapna yuhna, jwí Maáhdih túi jenah joí cádahcan, búdí ĩ wēina caá. Pánih túi jenah joiná, tubit moh yéejnit jumna yuhna, íih dinerodih oicanjeh, bita chah moh yéejnitdih búdí ĩ wūh wáacap jī. ³ Weém ennijijeh tigaá yeebdíh wā naawáp. Queét moh yéejnit yuhna, ĩ bíbohat pah bóo ĩ wūhup jī. Nihcan caá. Búdí pohba ĩ wūhup jī. ĩ náahatdih jíib chājat pínahdíhbut ĩ wūhup jī. Weémboó páant wā wūhat túutcah yuhna, queétjeh jenah joinít, páant bóo búdí weemđíh ĩ wūhup jī. ⁴ “Judea baácđih moón Jesúíhwā moh yéejnitdih búdí teo wáaquíhna, nin pah bóo meemđíh jwí wūhnidih queéđđih

ma wūhūú”, weemdíh ĩ niijíp be.* ⁵ Pánih wūhna, wā jenah joyát chah ĩ wūhup be. Íih dinerodih ĩ wūhat pínah játih, “Paá, ded pah ma weñat pínahdihjeh yoobópdih meemdíh wā chāj wūhbipna caá”, Diosdih ĩt niijíp wut be. Páant ĩ niiját túttimah, “Dios ā wutuchah joinít, yeéb Jesúih doonádih bohé jibnitboodíh ded pah ñi náahatdih jwī túi teo wáacbipna caá. Ded pah ñi wutuchah, jwī jepahbipna caá”, jwiítidih ĩ niijíp be. ⁶ Nit Macedonia baácdih moón íih dinerodih ĩ wūhatdih jenah joinít, yeéb Corintodih moondíhbūt wā jenah joyóp be. “Ninjíh moón búdí ĩ wūhat pah queébtūt ĩ wūhat pínahdih ĩ ámoh páña naáh”, wā niij jenah joyóp be. Páant niij jenah joinít, Titodih nin pah wā niijíp be: “Meém íih dinerodih queétdih mat wūh wáac jwíihat tútut wut jī. Pánih jwíihnit, nihat ĩ wūh wáacni dinerodih ma jwúub ámohat tútat tút niijná, ĩ pebhna ma jwúub bej páñaá”, Titodih wā niijíp be. ⁷ Yeéb túi chājnit jumna, jwī Maáh Cristodih ñi túi jenah joiná caá. Ā naáwátidih túi jéihnit, ñi túi naóh yapana caá. Caán ā weñat pínahdihjeh búdí chājíhna, yeebdíh jwī bohéat pah túi oinit, bitadidih ñi teo wáacna caá. Pánih túi chājnit jumna, ñíih dinerodih oicanjeh, moh yéejnit Jesúihwādidih teo wáaquíhna, biíc yoobó yeebdíh túi wūhat caá náahap.

⁸ Páant niijná, yeebdíh wutna wā chājcan caá. Obohjeéhtih, nit Macedonia baácdih moón ded pah jíghah ennit, moh yéejnitdih búdí ĩ teo wáacatdih yeebdíh wā naáwáp be, “Jwiítbūt búdí jíghah ennit, queétdih chah jwī wahbipna caá”, ñi niij jenah joyát pínah niijná. Páant ñi wūhuchah enna, “Queét Corintodih moón bitadidih túi jíghah en teo wáacnit ĩ jumna caá”, wā jéih niijbipna caá.

⁹ Jwī Maáh Jesucristo jwiítidih búdí oina, ā teo wáa-

* 8:4 Ro 15.26

catdih jwiít dih túi jenah joyát caá náahap. Nin baácboó ã dei jũúwát pínah játih, Diosjeéh jumna, nihat maáh ã jumuchah, caandih dedé judhdát át wihjican tagaá. Obohjeéhtih, nin baácboó dei jũóhnit, ã maáh wēpatdih cádahna, jwiít dih teo wáacat túut niijná, moh yéejni át jumup wut jĩ. Pánih teo wáacna, jwiítboó moh yéejnit jumna yuhna, ãjeéh jwĩ jumuchah, jwiít dihbut dedé judhdát ã wihcan niít. Pánih jígh ennit, ã teo wáacatdih jenah joinít, jwiít dihbut biíc yoobó bitadih jígh ennit, teo wáacat caá náahap.

¹⁰ Nin pah wã niíf jenah joiná caá: Ñi jwíh jenah joyátji buu biíc jópchi ã yapna caá. Con jópchi, nin Macedonia baác dih moón ĩ jenah joyát pínah játih, yeéb Judea baác dih moón Jesúihwã moh yéejnit dih jwíh teo wáaquíh jenah joinít ñit jumup wut jĩ. Pánih teo wáaquíh jenah joinít, con jópchidih ñi wūhat pínah dinerodih ñit á moh jwíhip wut yuh jĩ. ¹¹ Pánihna, játih túi wēinit ñi teo wáac jwíhat pah, buubut biíc yoobó wēinit, ñi wūhat pínah dih wūh péaat caá náahap. Ded búde dinerodih bíbohni chah ã wūhu naáh. Obohjeéhtih, ded nump bíbohni bainí ã wūhu naáh. ¹² Túi biíc yoobó wēinit, ñíh dinerodih oicanjeh, wūhat caá náahap. Pánih wēi wūhnidih Dios biíc yoobó ã wēi enbipna caá. Obohjeéhtih, bí dée wihcanniboodíh “Dinerodih ma wūhuú”, Dios ã niijcán caá.

¹³ Judea baác dih moón Jesúihwã dih yeebdíh wūhat túutna, “Queét Corintodih moón moh yéejnit ĩ jumna naáh”, wã niíf jenah joicán caá. Obohjeéhtih, yeéb, queébtut biíc yoobó ñi túi jumat pínah niijná, páant wã wūhat túutna caá. ¹⁴ Bui yeéb búde bíbohni jumna, queét bíboh cannitboodíh ñi jéih teo wáacna caá. Bíh lóa, yeéb moh yéejnit ñi jumuchah, queétoó búde bíbohni, yeebdíhbut ĩ jéih teo wáacipna caá. Pánih míc teo

wáacnit, nihat Jesúlhwā tui biíc yoobó jwī tui jum̄bipna caá. ¹⁵ Jon jātih Moisés nin pah āt niij daacáp tajī: “Chah b́dí jeémát ojdih j́ui yacniboó ā ubni yeó jáap ā jeémát pínahdihjeh ā bíbohōp be. Bainíjeh ubnibut caán yeó jáap ā jeémát pínahdihjeh ā bíbohōp be”, āt niij daacáp tajī.*

Titowā Corintona ī bejat

¹⁶ Yeebdíh wā oi teo wáaquíhat pah m̄ntih, Dios Titodi-hbut biíc yoobó oi teo wáaquíhat āt w̄h̄up taga. Páant ā tui oi teo wáaquíhatdih ennit, “T́ina caá, Paá”, wā niijná caá. ¹⁷ “Corinto t́tchidih moondíh jw̄ub enedih ma bejeé”, wā niijchah joinít, “J́u, wā bejmi caá”, ā niij wēi jepahap be. Caandíh wā naáwát pínah jātih, yeebdíh b́dí teo wáaquíhna, caanjéh ñi pebhna t̄b bejíhni ā jum̄up be.

¹⁸ Caandíh pej jum̄ni pínah bíh Jesúsdih jéihnidihbut ñi pebhna wā bejat t́utna caá. Ā pej jum̄ni pínahdih nihat nin Macedonia baácđih jum̄ni t́tchinadih moón Jesúlhwā b́dí ī wēi naóhna caá. “Caánboó Jesúh doonádih tui bohéni caá”, ī niij wēi naóhna caá. ¹⁹ Pánih wēi naóh-nit, Judea baácboó wā bejchah, weemdíh pej jum̄ bejni pínahdihbut caandíh ī ñiwip be. Nihat yeéb Jesúlhwā ñi w̄h wáacni dinerodih jwī j̄ibí w̄h̄achah enna, “Queét bíh baácđih moón Jesúlhwā jwiítđih oinit, dinerodih ī wahachah, b́dí ma teo wáacna caá, Paá”, Diosdih ī niij wēi naóh̄bipna caá. ²⁰ Ñi w̄h̄ni dinerodih jwī tui en daóbipna caá. “Pablowā jw̄ih dinerodih yee d́uc wána caá ĩt ch̄jap taga”, ñi niij jenah joicát pínah niijná, caán nihat tui wēi ennidih Títojeéh wā wahna caá. ²¹ Pánihna, jwī Maáh ā enechah, bitabut ī enechah, yoobópdih tui ch̄jáhna, bíhdihbut Títojeéh wā wahna caá.*

* 8:15 Ex 16.18 * 8:21 Pr 3.4

²² Titowā ñi pebhna ĩ bejehchah, biíhdihbut ĩjeéh wā wahna caá. Caanbút jwĩ Maáhdih jepahni, túi teo wũhni caá. Dawá láa bitadih túi oinit, ā teo wáacachah, wā enep be. Yeebdíh túi jenah joinít, “Queét Corintodih moón Jesúíhwā ĩh dinerodih ĩ túi wũh wáacipna caá”, wā niij wēi naáwáchah joinít, caanbút yeebdíh teo wáacadih búdí ā bejfhna caá. ²³ Nit caá ñi pebhna wā wahnit: Titodih ñi túi jéihna caá. Caán wā chéen caá. Jesúíhwādh wā teo wáacachah, caán wājeéh teoni caá. Bita chénewāboó ñi pebhna ājeéh bejnitdih ñi túi jéih jwũhcan caá. Queét chénat pah jwĩ Maáhdih túi teo wũhna, caandíh túi weñanit caá. Páant ĩ jumũchah enna, Jesúíhwā queédih ĩ ñío wahap be. ²⁴ Pánihna, ñi pebhna ĩ juibínachah, queédih ñi túi oi pej jumũú. Páant ñi oi pej jumũchah enna, ñi oyatdih wā naáwátji biíc yoobó ā jumatdih bita Jesúíhwā ĩ jéihbipna caá.

9

¹ Judea baácdih moón Jesúíhwā moh yéejnitdih teo wáacat túut niijná, dinerodih wahat pínahdih yeéb játih ñitát jéih tagaá. Pánih jéihnit ñi jumũchah, bainíjeh wā jwúub naóh daác wahna caá. ² Yeéb bitadih búdí ñi teo wáaquíhatdih jéihnit, nihat Macedonia baácdih moón Jesúíhwādh búdí niij wēi naóhna beé wā chā-jap be. “Queét Acaya baácdih Corinto tátchidih moón Jesúíhwāboó con jópchi Judea baácdih moondíh búdí teo wáaquíhat ĩ jenah joí jwíhip jĩ”, wā niijíp be. Páant wā wēi naáwáchah joinít, queétbut Jesúíhwā moh yéejnitdih búdí teo wáaquíhat ĩ jenah joiná caá. ³ Dinerodih ñi ámohochah, ĩ teo wáacat pínah niijná, nit biíc peihcannit jwĩ úudwā panihnitdih buũ ñi pebhna wā wahna caá. Páant ĩ teo wáacachah, weémboó ñi pebhna wā juibínachah, ñi wũh wáac páini dinerodih ennit, yeebdíh wā

naawátji biíc yoobó ã jumatdih nihát ï jéihbipna caá. ⁴ Biquína nin Macedonia baácdih moón wãjeéh ñi pebhna ï juibínachah, ñi wũhat pínah dinerodih ñi bíboh páicah, wã naawátji biíc yoobó ñi chãjcatdih enna, búdí wãta tíic tagaá. Yeebút búdí ñita tíic tagaá. ⁵ Yeebdíh ï teo wáacat pínah niijná, Titowãdih ñi pebhna wã bej páñat túutna caá. “Moh yéejnitdih jwí teo wáacat túut niijná, nin pah bóo jwí wũh wáacbipna caá”, ñi niijníji dinerodih ñi túi bíboh páñat pínah niijná, ï jéih teo wáacbipna caá. Páant ñi wũh wáac páñachah, ñi pebhna wã juibínachah, yeebdíh jwáub wũhat túutat ã wihcan niít. Pánihna, ñi wēi wũhat pínahdih ñi túi bíboh páñaá.

Búdí wũhat caá náahap

⁶ Nindih ñi túi náhninaá: Ded daocánnibitjeh ã momochah, daocánnijeh ã ãbbipna caá. Obohjeéhtih, dawá momniboó dawá ã ãbbipna caá. Páant ã chãjat dée pah, moh yéejnitdih teo wáacna, jwíh dinerodih oinit, bainíjeh jwí wũhuchah, Diosboó jwiítidih bainíjeh ã wũh-bipna caá. Obohjeéhtih, túi wēinit, búdí jwí wũhuchah, Dios jwiítidihbut chah búdí ã wũh-bipna caá. ⁷ Yeéb ñíih dinerodih ñi wũh wáacachah, túi jenah joí, “Nin pah bóo caá weemdíh jwí Maáh ã wũhat túutup”, niij jenah joinít, ñíih dinerodih oicanjeh, wēi wũhat caá náahap. “Bita weemdíh ï wũhat túutuchah, páant bóojeh caá wã wũhup”, niijcánjeh wũhat caá náahap. Bita ï niiját pínahdih jenah joicánjeh wũhat caá náahap. Páant, ñi túi wēi wũhuchah, Diosboó yeebdíh ã wēi enbipna caá.* ⁸ Ñi náahat chah Dios yeebdíh ã wũh-bipna caá, ñi bíbohátjéh bitadih ñi túi teo wáacat pínah niijná. Páant ã wũhuchah, chah dawádíh ñi jéih teo wáacbipna caá. ⁹ Jon játih David nin pah át niij daacáp tají:

* 9:7 Lc 6.38

“Ded túiniboó moh yéejnitdih ã túi wēi wūhna caá. Páant ã wūhuchah, Dios caandíh ã jwúub wūhbična caá, páantjeh bitadih ã jwúub túi teo wáacat pínah niijná”, ãt niij daacáp tajī. (Sal 112.9)

10-11 Dios jwī momat pínah, jwī jeémát pínahdihbut wūhni,* bitadih ñi wūhat pínahdihbut yeebdíh búdí ã wūhbična caá. Páant ã wūhuchah, bitadih chah ñi jéih teo wáacbična caá. Dios yeebdíh chah ã wūhuchah, yeéboó túi wēinit, queét Judea baácdih moón moh yéejnitdih ñi wūhndih jwiítdih ñi wūh yapaat túutna caá. Páant ñi wēi wūhuchah enna, queét nihat Diosdih wēinit, “Queét jwiítdih ī teo wáacat túina caá, Paá”, ī niij wēi naóhbična caá. ¹² Túi wēi wūhni, Jesúhwādhíh búdí ñi teo wáacna caá. Páant ñi teo wáacachah, dawá Diosdih búdí ī wēi naóhbična caá. ¹³ Páant ñi túi wēi wūhuchah enna, yeéb Jesúhwā ñi jummatdih nihat cáacwā ī jéihbična caá. Bitá Jesúhwā ñi túi chājatjidih ennit, “Paá, queéboó Jesúh túini doonádih naóhnihtjeh nihtcan, túi jepahniht caá. Pániht jumna, jwiítdih, bita míhwādhíhbut teo wáacat túut niijná, jwiítdih túi wēinit íih dinerodih it wahap taga. Páant ī jummatdih meemdíh búdí jwī wēina caá”, ī niij wēi naóhbična caá. ¹⁴ Queét Judea baácdih moón yeebdíh jenah joinít, búdí oina, nin pah ī niij wēi naóhbična caá: “Paá, queétdih búdí oinit, ma túi teo wáacachah, queét jwuh jwiítdihbut búdí oinit, ī túi teo wáacap be. Pánihna, jwiít nihtdih búdí oinit, ma teo wáacatdih túina caá”, ī niijbična caá. ¹⁵ Dios búdí oinit, teo wáacat túut niijná, jwiítdih wun wūhniht, ã túi ubat pínah niijná, ã wūh Jesúsdih ãt wah deyajip taga. Pániht wahna, chah túini ã chājatjidih jenah joinít, “Búdí ma teo wáacatdih túina caá, Paá”, caandíh jwī wēi niij jīh.

* 9:10-11 Is 55.10

10

Pablo Jesús ã naáwát túutni ã jumat

¹ Bũũ nindih ñi náhninaá. Weém, Pablo, yeebdíh jwíih bohénijeh tigaá. Obohjeéhtih, yeéb weemdíh nin pah ñi níj yeena caá: “Pablo ninboó jwíjeéh jumna, cáacwādhíh úumna, jéih naóhcanni pah ã jumna caá. Obohjeéhtih, bíaboó jumna, úumcanjeh jwiít dih jūih naóh daác wahni caá”, ñit níj yeenap wut be. Cristo cáacwādhíh oinit, teo wáaquíhna, íjcan túinijeh naóhni át jumap wut jī. Páant túinijeh ã naáwátji pah muntih weembút íjcan túinijeh yeebdíh wā naóh daác wahna caá. ² Pánih íjcan túinijeh naáwíhna yuhna, yee naóhndih wā wēp naóhna caá. Ñi pebhna wā juibínachah, ñi túi chāja chaáh, páant bóojeh, ñi yeeatdih ñi cádahaá, “Pablo jwiít dih jūihná”, niijná. Ñi cātíh jumnit, weemdíh nin pah ĩ níj yeena caá: “Diosdih jepahcannit ĩ jenah joyát bíic yoobó Pabobut ã jenah joiná caá. Pánih jenah joí bohéna, Cristodih weñáihcan, ã weñat pínahdihjeh ã bidna caá. Pánihna, Cristo ã naáwát túutni nihcan caá”, queét ĩt níj yeenap wut be. Páant niijnítdih búdí wā jūihbipna caá. ³ Diosdih jepahcannit míic naóhna, queét ĩ jenah joyátjīhchah ĩpí niijná caá. Obohjeéhtih, weembút cáacjeh jumna yuhna, queét ĩ chājat pah weémboó wā chājcan caá. Weemdíh yeejép naóhndih Dios ã wēpatjīh caá chah wāpí niijíp. ⁴ Pánihna, Diosdih yap yohnitdih weém túi yoobópdih wā wēp naóhna caá, ĩ yap yohatdih ĩ cádahat pínah niijná. Pánih wēp naóhna yuhna, wā jenah joyátjīhchah wā jéih cádahat túutcan caá. Obohjeéhtih, Dios ã wēpatjīh ĩ yap yohatdih wāpí cádahat túutna caá. Caandíh yap yohnit, ĩ jenah joyát yeejép ã jumatdih Dios ã wēpatjīh nihat cáacwādhíh wā jéihyana caá, yeejép ĩ jenah

joí cádahat pínah niijná. ⁵ “Nin pah caá Dios ã jumat”, niíj yee naóhntidih ã wēpatjīh wã cádahat túutna caá. Cáacwã Diosdih ĩjéihyat déedih jāhat panihnidih ã wēpatjīhjuh wã jéih yohna caá. “Maá Jesús, weemdíh ma túi teo wáacá, meemdíh yap yohcanjeh, yeejép wã jwúub jenah joicát pínah niijná”, jwiít nihadidih niiját caá náahap.* ⁶ Ñi pebhna wã juibínachah, yeejép jenah joicánjeh, caandíh ñi túi jepahatdih enna, det jwĩ Maáhdih yap yohna, páantjeh yeejép jenah joinítboodíh búdí wã peéh chājbpina caá.

⁷ Yeéb wíih bácahdihjuh ñi jéihna caá. Obohjeéhtih, wã jenah joyátboodíh ñi jéihcan caá. “Weem caá Cristo ã naáwátidih naóh yapaat túutni”, ded niijníidih nin pahbut niíj jenah joyát caá náahap: “Pablobut biíc yoobó ã naáwátidih naóh yapaat túutni caá”, ã niíj jenah joyó naáh. ⁸ Obohjeéhtih, yeéb nin pah ñi niijná caá: “Pablo nin pah ã niijná caá: ‘Corintodih moondíh Dios weemdíh bohénadidih ã bejat túutap be’, niijnít, jwiítidih maáh dée ã jumna caá”, ñit niijíp wut yuh be. Obohjeéhtih, ã bohéat túutni jumna, wã tíccan caá. Dios beé ñi pebhna weemdíh ã bejat túutap be, áih túini doonádih naóhna, yeebdíh wã teo wáacat pínah niijná. Páant ã naáwát túutni jumna, yeebdíh yéejaihcán, ñi túi jumat pínah niijná, áih wēpatjīh yeebdíh wã bohénap jī. ⁹ Pánihna, wēp naóh daác wahna yuhna, yeebdíh úumaíhcán, ñi túi túut nuumát pínah niijná, yeebdíh wã daác wahap be. ¹⁰ Biquína ñijeéh jumnit nin pah ĩt niijíp wut yuh be: “Pablo naóh daác wahna, úum náah jumni maáh dée pah tub wēpép ã wutna caá. Obohjeéhtih, ninboó jūóhna, oboh jumnijeh ã jumna caá. Pánihna, ã bohéni doonábut oboh naáwátjeh caá”, ĩt niijíp wut be. ¹¹ Páant ĩ niijíchah yuhna, ĩ niiját pah wã nihcan caá. Wã wēp naóh

* 10:5 Ef 6.11-17

daác wahat pahjeh muntih, ñi pebhna jubínit, ñi túi túut nuumát pínah niijná, biíc yoobó wêp naóhni wã jumbipna caá.

¹² Biquína ñijeéh jumnit, túi jéihcan yuhna, “Bita ï jéihyat chah jwiítboó jéihnit caá. Bitá Diosdih ï teo wãhat chah teo wãhñit jwí jumna caá”, ït niíj míic weñep wut yuh be. Obohjeéhtih, páant niíj wëina yuhna, túi jenah joicánnit, Diosdih túi teo wãhñit nihcan caá. Queét ï jenah joyát pah weémboó wã jenah joicán caá. ¹³⁻¹⁴ Weém cáacwã ï maáh nihcan caá. Obohjeéhtih, jwí Maáh Jesucristo ã wutatdih jepahnit, caandíh teo wãhñijeh caá. Yeebdíh bohénadih ã jib bejat túutuchah, wã jepahap jí. Wã jenah joyátjeh nihcan, Diosboó weemdíh ã wahachah, yap yohcanjeh, ã wutatdih wã jepahap jí. Páant ã wutatdih jepahnit, Jesúíh túini doonádh yeebdíh jwííh bohéni wã jumap jí. Pánih jwííh bohéni jumna, weemdíh wêp naáwát caá náahap. Ded pah wã bohéat pínahdih jwí Maáh weemdíh ã naáwáchahjeh joinít, wápí bohéna caá. Wã jenah joyátjeh wã bohécan caá. ¹⁵ Yeebdíh yee bohénitji ï wëi niiját pah, weémboó wã wëi niijcán caá. Bitá ï bohénitjidih ennit “Queét dih weémboó wã túi bohénachah, Cristodih ït jepahap taga”, wã niíj wëican caá. Wã tewatdihjeh wã wëi naóhna caá. Yeebdíh jwííh bohéni jumna, Cristodih chah ñi jenah joyát pínahdih wã náah yacna caá. Pánih náah yacna, ñi pebhna jwúub bohénadih wã bejíhna caá. ¹⁶ Pánih bohénit, jwí Maáh ã weñat pínahdih ñi túi chájachah ennit, biíh tútchinadih moondíhbut bohénadih wã bejbipna caá. Pánihna, ñíih baác yehboó bejnit, bita bohé jwuhcannitboodíh wã naóhbipna caá. Jesúíh doonádh joi jwuhcannitdihjeh naóhna, bita ï bohénitjidih “Wã túi bohéatji jíb queét jwí Maáhdih ï túi péena caá”, wã niijcán niít. ¹⁷ Páant niijnít, jon játih Dios naáwát dih naóh yapani nin pah át niíj daacáp tají:

“ Weemdíh dedé jadhdat wihcan caá, ĩ niijcá bojo naáh. Obohjeéhtih, ‘Jwĩ Maáh Dios, nihat jéihni, weemdíh ã túi teo wáacap be’, ĩ niijí naáh”, át niij daacáp tají.* ¹⁸ Det queétjeh “Jwiít caá túi bohénit”, niij jenah joinítidih Dios ã wēi encan caá. Obohjeéhtih, “Caán caá túi bohéni”, jwĩ Maáh Cristo ã niijníboodíh Dios ã túi wēi enna caá.

11

Yeenit ĩ bohéat ã tobohat

¹ Ded ã túi chājatjidih bitadih ã wēi naáwáchah, āpí túican caá. Páant naáwát ã túicah yuhna, ded pah wā chājatdih bita yeebdíh ĩ yeeatdih wā naóh yoobábipna caá. ² Weém jĩ Jesúhí túini doonádih yeebdíh wā jwíih bohénap jĩ. Dios yeebdíh búdí ã oyat biíc yoobó weembát yeebdíh wā oina caá. Pánih oinit, Cristodih jepah cádahcan, ājeéh biícidih ñi jummatdih yeebdíh búdí wā náah yacna caá. ³ Obohjeéhtih, bita yeejép ĩ bohéatdih yeéb ñi joyát pínahdih búdí wā úum yacna caá. Jon játih mai pah jígozni Satanás Evadih búdí át yee naáwáp wut jĩ. Páant ã yee naáwátidih jepahnit, Eva Dios biícidih mi jummatdih mit cádahap wut jĩ. Páant ã yeeatdih mi jepahatji dée pah muntih, bitaboó ĩ yee bohéatdih yeebbát jepahnit, Cristodih ñi cádahíhatdih búdí wā úum yacna caá.* ⁴ Det wā bohéatji pah bohécan, “Jesús nin pah jumni caá”, niij yee bohénadih ñi pehbboó ĩ juibínachah, ñit wēi jwāáhji tagaá. Yeebdíh wā bohéatji biíc yoobó ĩ bohécah yuhna, ¿dépanihna jenah joicánjeh, queétdih ñi jepah? “Nin pah caá Túini Espíritu ã chājap”, ĩ niij yee bohénachah, ñit joijí tagaá. Caandíh wā naáwátji biíc yoobó ĩ naóhcah yuhna, ¿Dépanihna queét yee bohénitboodíh yeéb ñi jepah? Jesúhí túini doonádih wā naáwát túttimah,

* 10:17 Jer 9:24 * 11:3 Gn 3.1-5; 13

¿Dépanihna yeéb yee naóhnitboodíh ñi túi joí? Páant ñi chājachah enna, Cristodih ñi pée cádahat pínahdíh wā úum yacna caá. ⁵ Queét yee bohénit “Jwíftboó Dios ā bohéat túutnit bita ā wahnit chah jéihnit jwí jumna caá”, ĩ niijíchah yuhna, “Weém Dios ā bohéat túutni wā jumuchah, weemdíh chah jéihnit nihcan caá”, wā niij jenah joiná caá. ⁶ Túi wéheni nihcan yuhna, Dios naáwát dih túi beh joiní caá wā jumup. Ā naáwát dih wā bohénachah joinít, páant wā jumatdih yeéb ñi túi jéihna caá.

⁷ Nindih ñi túi jenah joyoó: Yeebdíh Jesúh túini doonádih bohéna, wāpí jíib úbhcap jĩ. Páant wā bohéat jíib úbhcanjeh, moh yéejni dée wā jumup jĩ. Pánih jumna yuhna, yeébboó moh yéejcanjeh, ñi túi jumat pínah niijná, yeebdíh wā túi teo wáacap jĩ. Pánih teo wáacna, ¿yeebdíh wā túi chājcanit beé? ¿Weembút yeebdíh jíib wā niij jíih, queét bita bohénitdih ñi wēi enat pah, weemdíhbut ñi jwúub wēi enat pínah niijná? ⁸ Obohjeéhtih, yeebdíh wā bohénachah, biíh tútchinadih moón dawá Jesúhwā ñijeéh wā jumat pínah niijná, íih dinerodih weemdíh ĩ wūhup jĩ. Yeebdíh teo wáacat túut niijná, ĩ wūhni dinerodih nūmát dée wā chājap be. ⁹ Ñijeéh jumna, bií dée bíbohcan yuhna, yeebdíh dinerodih wāpí úbhcap jĩ. Jwí údwā panihnit Macedonia baácdih moón Jesúhwā ñi pebh wā jumuchah, nihat wā náahatdih ĩ úb juibínap jĩ. Páant ĩ úb juibínachah, yeebdíh dinerodih wā úbh tac buugácap jĩ. Túttimahbut, yeebdíh wā úbh tac buugácan niít.* ¹⁰ Cristo yoobópdih ā naáwát pah, weembút áih jumna, yoobópdih nindih wā naóhna caá: Jesúh túini doonádih jíib wihcanjeh yeebdíh wā bohéatdih búdí wā wēi naóhna caá. Biíc yoobó

* 11:9 Fil 4.15-18

jíib wihcanjeh wā bohéat pínahdihbut nihat ñíih baácđih moondíh jéihnit, páant wā wēi naáwátđih joinít, “Caán dée āpí chājcan caá”, ĩ niijcán niít. ¹¹ Yeebdíh dinerodih wā wābhcatjđih jenah joinít, ĩ ded pah tigaá ñita niíj jenah joí? “Pablo jwiítđih jíib wābhcan, jwiítđih ā oican niít”, ĩ ñi niíj jenah joí niít? Nihcan caá. Yeebdíh búdí wā oina caá. Páant wā oyatđih Dios ā jéihna caá. ¹² Jíib wihcanjeh páantjeh yeebdíh wā bohébična caá, queét yee bohénitboó “Pablo ded pah yeebdíh ā bohéat biíc yoobó caá jwiítbut jwípí bohéna caá”, ĩ yee niijíchah joinít, queétđih ñi joyáh bojat pínah niijná. Queét yee bohénit ĩ bohéatji jíib yeebdíh ĩpí wābhna caá. Obohjeéhtih, weémboó wāpí jíib wābhcan caá. Pánihatđih túi jenah joinít, mácah jwí jumatđih ñi túi jéihbična caá.

¹³ Pánih chājnit yoobóđih Jesús ā bohéat tútñit nihcan, queét yeenitjeh caá. “Jwiít caá Jesús ā bohéat tútñit”, niíj naóhna yuhna, ā wahnit nihcan caá. Páant niijná, wā jumat dée pah ĩ jumíhip yuh caá. ¹⁴ Pánihna, yeenit jumna, páant ĩ chājat pínahđih wāát jéihyep be. Yeejépwā ĩ maáh Satanásbut biíc yoobó āpí chājna caá. Dawá láa caanbút yeena, túini ángel, Dios ā wahní pah ā míic jíghana caá. ¹⁵ Satanás ā chājatđih jéihna, caandíh teo wāhñitbut “Jesús ā wahnit caá”, niíj yeenit, Diosđih teo wāhñit pah ĩ jumíhatđih wāát jéihyep be. Túi chāj-cannit jumna yuhna, túi chājnit dée pah ĩ jumíhna caá. Pánihna, Diosboó nihat ĩ yeeatji jíib queétđih búdí ā peéh chājbična caá.

Pablo yeejép ā yapatji

¹⁶ Bwū jwuhna, ded pah wā jumatjđih wā wēi naóh-bična caá. “Pablo ā túi chājatjđih tub wēi naóhniabeh caá”, weemdíh ñi niíj jenah joicáh, ā túimi nacaá. Obohjeéhtih, weemdíh páant niíj jenah joiná yuhna, ded pah

wā yapatjidih wā wēi naáwáchah, bainíbit ñi joi jwáhúú.
¹⁷ Yeebdíh pánih naóhna, jwí Maáh Jesús weemdíh “Ma yapatjidih ma naáwá queétdih”, ā niijcáh yuhna, ded pah wā yapatdih wā naóhbipna caá. ¹⁸ Dawá bitaboó ded pah ī túi chājatjidih wēi naóhna, weembút ded pah wā yapatjidih wā wēi naóhbipna caá. ¹⁹ Yeéboó “Chah túi jéihnit jwí jumna caá”, ñi niij jenah joiná yuh caá. Obohjeéhtih, yee naóhnitboó ī naáwáchah yuhna, ñi túi wēi joiná caá. ²⁰ Queét ñi maáta dée, yeebdíh búdí ī wutuchah, ñi túi wēi joiná caá. Dawá láa ñíh dinerodih ī yee dúuc wáina caá. “Jwiít nihat jéihnit jwí jumuchah, jwiít dih ñi túi weñeé”, ípí niijná yuh caá. Bíh láa yeebdíh íjnit, ī mao tícana caá. Páant yeejép yeebdíh ī chājachah yuhna, ¿Dépanihna páantjeh queétdih ñi túi jepah? ²¹ Ñijeéh jumna, “cáacwádih úumni”, ñi niijní, queét ī chājat pah weémboó wā chājcap be. Páant wā chājat pínahdih wā úumatjidih naóhna, wā tícna caá. Queét ī chājat pah chājcan yuhna, Jesús ā wahní wā jumatdih ñi túi jéihyat pínah niijná, weembút ded pah wā yapatjidih wā wēi naóhbipna caá.

²² Queétboó bita chah jéihnit jumíhna, “Jwiít judíowā jwí jumuchah, jwiít dih ñi weñeé”, yeebdíh ípí niijíp wut be. Obohjeéhtih, weembút judío mun tigaá. Queétboó “Jwiít Israel ā juméná, Dios ā ñíonitji jwí jumna caá”, yeebdíh ípí niijíp wut be. Obohjeéhtih, weembút Israel ā jumima mun tigaá. Queétboó “Jwiít Abraham ā juméná, ‘Yeebdíh wā túi chāj wāhbipna caá’, Dios ā niijnítji caá”, yeebdíh ípí niijíp wut be. Obohjeéhtih, weembút Abraham ā jumima mun tigaá. ²³ Queétboó “Cristodih teo wāhñit jwí jumna caá”, yeebdíh ípí niijíp wut be. Páant ī niijíchah joinít, nin pah yeebdíh wā niijná caá: “Weembút Cristodih teo wāhñi mun tigaá. Weém caá bácah queét ī tewat

chah búdí teoni”, yeebdíh wā niíj naóhna caá. Páant niíj naóhna, páantjeh jenah joicánnit ĩ wéheat pah naóhna yuhna, wā tíccan caá. Queét ĩ teo wūhat chah Cristodíh wāpí teo wūhup be. Jesúíh túini doonádih wā bohéátji peéh dawá láa nemat muúboó weemdíh ĩ nemep jí. Dawá láa weemdíh ĩ puñup jí. Dawá láa cáacwā weemdíh ĩ mao yohíhip jí. Páant ĩ mao yohíhichah, weém yeejép wāpí yapap jí.* ²⁴ Cinco láa jwiít judíowā jwí maáta weemdíh ĩt tewat túutup tají. Weemdíh ĩ tewat jummat pah, tubit yéej chājnitdih momo jiwí chóo coóh jumni tōpnajíh ĩ puñat biíc yoobó treinta y nueve láa weemdíh ĩ puñup jí.* ²⁵ Biíc peihcanni láa Romanowā weemdíh teonit, máa doóbhnaíh ĩ puñup jí.* Biíc láa weemdíh mawíhna, jeejíh ĩ yohop jí.* Biíc peihcanni láa búdí jāáj chóojíh jib bejna, jwí daabáp jí. Biíc láa daabnít, máa naadíh teonit, búdí muj tacdih pah daa jūóh, caán yeó jáap pah táah bej, jwúub pah túo bejat dée wā jumuchah, ĩ ubup jí. Pánihna, caán láa, wā wuníhip jí. ²⁶ Dawá láa Jesúíh túini doonádih bohénit, yuúp wā jib bejep jí. Pánih bohé jibnit, búdí yeejép wā yapap jí. Biíh láa tobohni mujnadih wā bejep jí. Biíh láa namáboó jib bejehah, bií déedih chewe mao dúuc wáyat dée ā tobohóh jí. Biíh láa wā déewājeh weemdíh ĩ yéejahíhip jí.* Biíh láa judíowā nihcannitbut weemdíh ĩ mawíhip jí.* Tútchinaboó, tútchi wihcapboó, búdí mujboobút wā jumuchah, wunat dée ā tobohóh jí. Biíh láa “Jwiít Jesúíhwā caá”, niíj yeenit, ĩ mawat dée ā tobohóh jí. ²⁷ Jesúíh túini doonádih bohéna, búdí wāpí tewep jí. Pánih teona, dawá láa ũocanjeh wā bohé daa jūúwup jí. Dawá láa jeémát wihcah, nuugúp tubuchah,

* 11:23 Hch 16.23 * 11:24 Dt 25.3 * 11:25 Hch 16.22 * 11:25 Hch 14.19
 * 11:26 Hch 9.23 * 11:26 Hch 14.5

tubít taca jootóchah, búdí yeejép wā yapap jĩ. Dawá láa dawát pínah yéguehbut wihcah, búdí cúbuhuchah, yeejép wāpĩ yapap jĩ.

²⁸ Pánih yeejép yapna, páant bóojeh át nihcap jĩ. Yeó jáap jummat pah nihat Jesúíhwā “caandíh cádahná”, niijná, búdí wāpĩ náhni dahwana caá. ²⁹ Biíc Jesúíh ā tubúp chūúúchah, weembút tubúp chūúúhni pah wā jumna caá. Bitá Jesúíhdih ĩ yéej chājat tútuchah enna, queét yeejépwāboodíh búdí wā íjna caá. Pánihna, yeéb nihat Jesúíhwā, wā weh dée ñi jumuchah, yeebdíh um yacna, yeejép wāpĩ yapna caá.

³⁰ Páant yeejép wā yapatjidih wēi naóhna, ded pah wā túi chājatdíh yeebdíh wā wēi naóhcan níit. Obohjeéhtih, wā wēpcatjidih yeebdíh wā wēi naóhbpna caá. ³¹ Páant wā naáwáchah joinít, “Yoobópdi h caá páant ā niiját”, Dios ā níj jéihna caá. Caán caá jwĩ Maáh Jesucristo íp. Pánihna, yeó jáap jummat pah “Paá, meemjéh nihat jéihni, chah wēpni caá”, túi wēi niiját caá náahap. ³² Weém Jesucristodih wā jwíih jepahat túttimahbitjeh, Damasco tútchiboó wā jumuchah, caán tútchidih moón ĩ maáh, Aretas nump jumni, weemdíh át tewat tútup wut jĩ. Pánihna, nihat Damasco tútchi wáihyat júdu jěcnadíh áih soldadowādih át páñat tút wut jĩ, wā bac bejechah ĩ tewat pínah niijná. ³³ Páant ĩ páñachah enna, wā chéénwā búdí wuhdih weemdíh waadát túttnit, wáihyat júdu dih jumni muú enat jěcmant ĩ cádah deyanap jĩ. Pánih cádah deyanit, ĩ teo wáacachah, moh yéejni wā jweyép jĩ.*

12

Pablo oo jummat dée ā enat

* 11:33 Hch 9.23-25

¹ Bũũ weemdíh ded pah biíh ã yapatjidih wã jwúũb naóhbiþna caá. Queét yee bohénitboó “Jwiítjeh caá oo júmat dée jíghatdih enna, chah jéihnit jwĩ jumũp”, ĩ niíj naóhna yuh caá. Obohjeéhtih, jwĩ Maáh weemdíhbut oo máh enat dée pah ã jíghop jĩ. Páant ã jíghatjidih yeebdíh wã naóhbiþna caá. Ded pah weemdíh ã jéihyaatdihbut wã naóhbiþna caá. ²⁻³ Catorce jópchi játih Dios weemdíh japboó ã ub púũh laab béjep jĩ. Ded pah ã ub púũh laab béjatjidih wã jéihcan caá. Wíih bácahdih, wíih caolihdihjeh ã ub bej déeji oo júmat pah enatjidih, wã jéihcan caá. Diosjeh caá ã jéihyep. ⁴ ã pebhboó, Paraíso wãt jumũpna juibínit, ã naáwáchah wã joyóp jĩ. Jwiít cáacwã-jeh jwĩ jéih naóh bũũjácát déedih wã joyóp jĩ. Páant caandíh wã joyóchah yuhna, weemdíh ã jwúũb naóh yapaat túutcap jĩ. ⁵⁻⁶ Páant weemdíh ded pah ã yapatdih wéi naáwíhna yuhna, weemjéh ded pah wã jumãtdih wã wéi naóhcan niít. Obohjeéhtih, yoobópdih ã jumũchah, wã jwúũb naáwáchah nihna, áta túi taga. “Pablo túini oo júmat dée pah enna, Jesús ã wahní nacaá”, ñi niíj weñatdih yeebdíh wã náah yaccan caá. Obohjeéhtih, ded pah wã chájatjidih, ded pah wã bohéátjidihbut jenah joinít, “Pablo jwĩ Maáh ã bohé jibat túutni caá”, ñi niíj jéihyatdih wã náah yacna caá. Weemjéh wẽpcanni wã jumãtdih ñi jéihyat pínah niijná, bũũ ded pah biíh wã yapatjidihbut yeebdíh wã naóhbiþna caá. ⁷ Chah túini oo júmat déedih enna, “Weém caá bácah chah jéihni”, wã niíj jenah joyát weemdíh ã tobohna caá. Páant ã tobohat pínahdih jéihna, Dios Satanásdih weemdíh yeejép át yapat túutũp taga, “Weemjéh wẽpcanni caá”, wã niíj jenah joyát pínah niijná. ⁸ Pánih jumna, biíc peihcanni láa jwĩ Maáh Jesúsdi caán yeejép yapatdih ã yohat pínahdih wã uúbũp yuh be. ⁹ Obohjeéhtih, weemdíh nin pah ã

niij jepahap be: “Caandíh wā yohcan niít. Obohjeéhtih, caandíh yohcan yuhna, meemdíh búdí oinit, wā túi teo wáac bipna caá. Pánih wēpcannijeh jumna, wā oi teo wáacat pínahdih chah ma bidbipna caá. Pánihna, meemdíh búdí wā teo wáacachah ennit, wā wēpatboodíh nihat cáacwā ĩ jéihbipna caá”, Jesús weemdíh ā niij jepahap be. Páant ā niijíchah joinít, wā wēpcatdih wā wēi naóhbipna caá, ā wēpatjìh weemdíh búdí ā teo wáacat pínah niijná. ¹⁰ Páant tigaá Jesúh wā jummat jíib yeejép yapna, búdí wā wēina caá. Bitá weemdíh yeejép ĩ wéhenachah, yeejép ĩ chājachah, ĩ jíghanachah, dedé biíh weemdíh yeejép ā yapachah yuhna, wāpí túi jumna caá. Pánih wēpcanni wā jumuchah, Jesús ā wēpatdih chah búdí bidnit, “Weém jéihcanni wā jumna yuhna, ā teo wáacatjìh wā túi buujábipna caá”, wā niij jéihna caá.

Corinto tútchidih moondíh búdí ā jíghahat

¹¹ Bitá weemdíh yeejép ĩ naáwáchah joinít, yeéboó queétdih ñi naóh bóod chuñuchah, āta túi tagaá. Obohjeéhtih, páant ñi niijcáh, weemjéh yeebdíh wā míc wēi naóhna caá. Weém oboh jumni dée wā jumuchah yuhna, queét yee bohénit “Jwiít caá bácah Dios ā bohéat túutnit”, niijnítboó wā chah ĩ jumcan caá. ¹² Ñijeéh wā jumuchah, Dios ā naáwát túutni wā jummatdih júutíhna, ā wēpatjìh weemdíh búdí āpí teo wáacap jí. Páant ā teo wáacachah, dawá láa wunnitdih booanit, nemépwádihtut wā yohop jí. Pánih chājnit, jwiít cáacwā jwí jéih chājca naáhdih ā wēpatjìhjah wā chāj júutup jí. Weemdíh eníhcannit ĩ yéejáihichah yuhna, wā chuuná yuhna, wā teo cádahcap jí. ¹³ “Pablo jwíjeéh jumna, biíh tútchidih moondíh ā túi chájat pah jwiítidih ā túi chájcap jí”, ¿yeéb ñi niij jenah joí niít? Nihat tútchidih moondíh biíc yoobó wāpí túi chájna

caá. Obohjeéhtih, yeebdíhjih wíih pínah dinerodih wā úúbh tac búugácap jī. ¿Pánih úúbh tac búugácan, yeebdíh wā yéej chājnit jī? Caán yeejép ā jumuchah, wā jígahna caá. Caán yéejatdih weemdíh ñi yohoó.

Ī pebhna ā jwúub jib bejat pínah

¹⁴ Nin wā naáwát pínahdih ñi túi joyoó: Chéne láa jwibíniji búu ñi pebhna jwúub bejat túut caá wā chājp, páant muntih. Ñi pebhna jwibínit, yeebdíh wíih dinero pínahdih con láa wā úúbhcatji pah, búu láabut wā úúbh tac búugácan niít. Ñíih dinerodih náahcan, Jesúsdihtúit joinít ñi jumata caá yeebdíh wā náah yacap. Wébít ĩ mána ĩ náahatdih wūhñit pínah nihcan caá. Obohjeéhtih ĩ mána caá queét wébítboodíh ĩ náahatdih ĩpí wūhup. Páant ĩ chājat pah yeéb wā weh panihñit ñi jumuchah, wā náahatdih yeebdíh wā úúbhcan niít. ¹⁵ Ñi ĩp panihni jumna, yeebdíh búdí oinit, nihat wā bíbohatdih wēi wūhñit, yeebdíh wā teo wáaquíhna caá. Pánih teo wáaquíhna, búdí chuná yuhna, wā teo cádahcan niít. Páant yeebdíh chah wā oyochah yuhna, ¿yeéb weemdíh nump ñi oi niít?

¹⁶ “Pablo jwíjeéh jumnit, áih pínah dinerodih āpí úúbh tac búugácap jī”, ñi niíj jéihna caá. Obohjeéhtih, biquína ñijeéh jumnit weemdíh nin pah ĩt niíj jenah joi tágaá: “Jwíih dinerodih moh yéejnitdih ā wūh wáacat túutnit, jwíitdih jéihcha dúuc wáiniabeh tagaá”, ĩ niíj jenah joiná caá. ¹⁷ Páant ĩ niiját pahjeh chājni jumna, ¿ded pah tigaá caandíh wāta nih chāj? ¿Ñi pebhna wā wahnitdih nit beé yeebdíh wā jéihcha nuumát túutup? Páant wā chājp jī. ¹⁸ Játih Titodih ñi pebhna bejat túutnit, bíh Jesúsdihtúit ájeéh wā pej jum bejat túutup jī. Páant ñi pebhboó jwibínit, ¿Tito yeebdíh ā jéihcha nuumnit jī? “Nuumcánni caá”, ñi niíj jéihna caá. Jwíit chénat pah

biíc yoobó jwĩ maáh ã weñat pínahdih chājnit caá. Pánih jumnit, yeebdíh oinit, túinijeh ã chājat pah, weembút biíc yoobó yeebdíh túinijeh wāpí chājna caá.

¹⁹ Páant wā jāh niijíchah joinít, ¿ded pah ñita niíj jenah joí? “Caandíh jwĩ wēi niiját pínahdihjeh caá ã bidip”, ¿ñi niíj jenah joí niít? Obohjeéhtih, weém Cristoíh jumna, Dios weemdíh ennit, “Ma túi chājna beé”, ã wēi niiját pínahdihjeh caá wā náahap. Yeebdíh teo wáaquíhna, ded pah wā chājatjidih wā naóh beedánap be, jwĩ Maáhdih chah ñi túi jepahat pínah niijná. ²⁰ Ñi pebhboó wā juibínachah, wā náah yacat pah ñi chājcah, búdí yeebdíh wā úum yacna caá. Páant ñi túi chājcah, caanná juibínit, weembút yeéb ñi náah yacat pah wāta chājcan tagaá. Pánihna, yeebdíh búdí wā jenah joiná caá. ¿Páantjeh ñi míic jūih niít? ¿Páantjeh bitáih bií déedih ñi en ñinah íj niít? ¿Búdí ñi míic íja niít? ¿Biquína páantjeh íih pínahdihjeh bid niít? ¿Buubut páantjeh bitadih ñi yee naóh niít? ¿Yeejép dooná ñi jummatdih ñi cádah jwuhcan niít? ¿“Weém nihat jéihni caá”, páantjeh ñi míic wēi niíj niít? ¿Túbit ñi míic en naóh cádah jwuhcan niít? ¿Yeéb biquína ñi jenah joyátdihjeh niít ñi chājap? Yeéb páant ñi chājatdih wā úum yacna caá. ²¹ Pánihna, ñi pebhna juibínit, ñi túut nuumcátidih wā enechah, Dios weemdíh āta tíicat túut tagaá. Jon játih yéej chājnitji dawá páantjeh í yéej chājatdih cádahcah enna, búdí wāta jígah taga. Í náah chājat, yeejép chājíhat jenah joyát, í náahat pahjeh chājatdihbut í cádahcah enna, búdí wāta jígah taga. Páant ñi chājatdih páant bóojeh ñi cádahaá, caanná juibínit, wā jūihcat pínah niijná.

¹ Jon yeebdíh chéneji juibí enniji buu bejna, biíc peihcanni láa bejat túut caá wā chājap. Pánihna, ñi yéej chāj cádahna, túiniboodíh túut nuumnít, weemdíh ñi túi páñaá. Ñijeéh jumnitdih í yéej chājatdih cádahat túutnit, Moisés nin pah ā niíj naóh daacátjidih ñi túi náhninaá: “Deddih ñi peéh chājat pínah jātih, caán ā yéej chājachah ennit, chénewā, biíc peihcannit í enatji pahjeh í naáwá naáh. Páant moonjéh í naáwát túttimah, ñi peéh chājachah, ā túibipna caá”, Moisés āt niíj daacáp tajī.* ² Ñi pebhna wā jwúub juibí láa yéej chājnitdih nin pah wā niíj naáwáp jī: “Ñi yéej chājatdih cádahnit, túiniboodíh ñi túut nuumú. Ñi cádahcah, jwúub juibína, wā peéh chājipna caá”, wā niijíp jī. Páant wā niijátji pah, buu ñijeéh jumcan yuhna, queét páantjeh yéej chājnitdih, yeéb nihatdihbut, wā jwúub naóhna caá. Páant bóojeh, ñi yéej chājatdih cádahnit, túiniboodíh ñi túut nuumú. Ñi pebhna juibínit, ñi cádahcatdih enna, bádí wā peéh chājipna caá. Yúup wā jumuchah, “ ‘Wā peéh chājipna caá’, niijná yuhna, ā peéh chājcan níit”, ñi niíj jenah joicá bojó. ³ Cristo ā naáwátdih naóh yapani wā jumatdih ā júutat pínahdih bidna, páant wépép weemdíh ā peéh chājat túutuchah enna, ñi jéihbipna caá. ¿Bádí ā wēpatjīh yeebdíh ā teo wáacatjidih ñi náhnican níit? Yeéb yéej chājnitdih ā peéh chājat pínahbut biíc yoobó wépép ā jumipna caá. ⁴ Jwiít cáacwā jwī wēpcat pah Cristo wēpcanni jumna, cruzboó āt wun wūhup wūt jī. Pánih wunna yuhna, Dios ā wēpatjīh boo pud jūóhniji, buu páantjeh báadhni ā jumna caá. Cruzboó ñuhna, wēpcanni ā jummat pah weembút wēpcanni wā jumna caá. Wā jenah joyátjīh ñi yeebdíh wāta jéih teo wáaccan tagaá. Obohjeéhtih, Cristo wājeéh jumna, Dios ā wēpatjīh yeebdíh

* 13:1 Dt 17.6; 19.15

teo wáacadih wā juibíipna caá.

⁵ Yeéb míicjeh nin pah ñi míic niíj wáabh joyoó: “¿Ded pah wā chājatji? ¿Yoobópdih Jesúsdiñ wā jenah joí niít? ¿Caán ã náah yacatdih wā túi jepah niít?” ñi míic niíj wáabh joyoó. Caandíh yoobópdih jenah joiná, ã náah yacatdih ñi túi jepahachah, Jesús ñíih caolihboó ã jumna caá. Obohjeéhtih, yoobópdih caandíh jenah joicán, ã náah yacatdih jepahcan, áihwā ñi nihcan caá. ⁶ Weémboó caandíh túi jenah joiní, ã náah yacatdih jepahni wā jummatdih wā jéihna caá. “Weém Jesúsíh caá”, niíj yeeni wā nihcan caá. Páant wā jummatdih yeebdíhbut wā jéihyaíhna caá. ⁷ Ñi yéej chājcat pínahdih náah yacna, Dios yeebdíh ã túi teo wáacat pínah niijná, búdí wā wáabhna caá. Ñi pebhna juibínit, páant ñi yéej chājcatdih wā enechah, weemdíh Dios yeebdíh ã peéh chājat túutcan niít. Páant ã peéh chājat túutcah, wā wéibipna caá. Obohjeéhtih wā peéh chājcatdih ennit, “Pablo Dios ã wēpatjíh queédih peéh chājcan, Dios ã wahni nihcan nacaá”, ñi niíj jenah joyóchah yuhna, wā túi wéibipna caá. Dios weemdíh ã bohé jibat túutatjidih ñi jéihyat pínahdih wā náah yacna yuhna, yeéb ñi túi chājat pínahdih chah wā náah yacna caá. ⁸ Ñi yéej chājatdih cádahnit, túiniboodíh ñi túut nuumátdih enna yuhna, yeebdíh wā peéh chā-jachah, yoobópdih áta nihcan tagaá. Pánihna, yoobópdih chājíhna, yeebdíh wā bohéibipna caá, Dios naawátdih túi beh joinít, chah ñi jepahat pínah niijná. ⁹ Yeéb Cristodih ñi túi jenah joyóchah, Dios ã wēpatjíh yeebdíh peéh chājat ã náahcah, búdí wā wéibipna caá. Pánihna, Diosdih búdí wā wáabhna caá, ã weñat pínahdihjeh ñi túi chājat pínah niijná. ¹⁰ Dios ã wēpatjíh yeebdíh peéh chājíhcan, ñi pebhna wā bejat pínah játih wā daác wahna caá, yéej chājatdih cádahnit, ñi túut nuum páñat pínah niijná. Dios

ã wēpatjīh yeebdīh jīgahañhcan, wāpí tui bohéna caá, ñi tui jummat pínah niijná.

Pablo ã péé túyat túutat

¹¹ Bũũ wã úudwã panihnitá, yeebdīh wã túyat túutna caá. Cristodih chah jenah joinít, túinijeh ñi jumũú. Nin wã naóh daacát dih ñi tui jepahaá. Cristodih chah jenah joyát pínahdih ñi míic teo wáacá, bíicdih tui jummat túut niijná. Páant ñi tui jumũchah ennit, Dios ñijeéh ã jum̃bipna caá. Caán jwiít dih búdí oinit, míic oyat túutna, jwiít bíicdih ã tui jummat túutna caá. ¹² Jesúíhwã jumna, ñi tui wēi úúbú. ¹³ Nihat ninjīh moón Jesúíhwãbũt yeebdīh búdí ã túyat túutna caá. ¹⁴ Yeebdīh búdí wã úúbhna caá, jwĩ Maáh Jesucristo yeebdīh oinit, ã tui teo wáacat pínah niijná. Dios búdí ã oyatdih ñi jéihyat pínah, Túini Espíritu ñijeéh ã jummat pínah, yeéb bíicdih ñi tui jummat pínahdihbũt wã úúbhna caá. Pániñ úúbhnit, yeebdīh búdí wã túyat túutna caá.

Páant bóojeh tigaá wã naáwát.

Pablo

Dios ã jáap naáwát tólih New Testament in Cacua

copyright © 2008 Wycliffe Bible Translators, Inc.

Language: Cacua

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cacua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 12 Mar 2019 from source files dated 5 Mar 2019

34c9543b-57a6-5290-ab7b-4fa15529a7e2